

ZUDA VETI GULIVE'INE GOHI MA HEBILAIO' ALEVE IZESU' ZUHO MINANI' NETI LUHUVU NITE'INE VE

**Hebilao' Ve Ma Izesu' Evenele Zuho Minani' Neti
Luhuvo Nite'inemu' Gomu' Gataa' Gamazi**

Mene luhuvo nite' gizive a'mido' gulive've gizamine' nenako ne'mo nene evenelite ve ne'mo gizine' noloseive li gilani' nene evene' ato' atokumu' gilaa' ani' ve. Ado' malite Banabasi' gizine' noloseive lavo malite nene Izesu' evenele zuho Loma ebeku' minaveliti gizebo ve'ine gana' di oti-ngidangutu' mali'mo gulive Kelemedo' ve lo minine' ne'mo gizine' noloseive lavo ido' malite Luka' gizine' noloseive laa' ani' ve. Ido' evene' muki' nene aposolo' Paulo' gizine' noloseive li gilaa' ani' ve. Matini Luta' aza Apolo' gizine' noloseive lo giline'. Nemu' nene laza a'mine luhuvo nite' nene zaho gizihe nemu' gele guno amalone' o neine' nene mo soto' o neive. Ido' a'mine luhuvo nite' nene zamotinemu' gehepeve gizine' neve nemukisi nene mo gele lamine' amune. Hebilao' Veliti luhuvo nite'ine ve lo laa' noune. Ido' a'mine gulive Hebilao' nene Zuda vemu' gulive'ine gohi ma ne neive. A'mine luhuvo niteku' gize-ngidine' gamaziloti' nene ti' lo gele none: Gizive aza gopo gizamo Zuda ve linge ebe' mauti' ve minave nene gize-ngidine' ve lo gele none. A'mine Zuda ve ingine ingi monaa' ani' ebeli'mi gulive nene gizamine'za nGiliki gamazi laa' ani' nenako nemu' a'mine ebe' nene Zuda veliti misubo'ine heta minine' noloseive. A'mine aleve ingine gozopoti' Izesu' evenele zuho minani' ve lo mene luhuvo niteli'mo nolo-limive. Izesu' evenele zuho minangumu' di goloso palasa i-ngidani'za ingine Izesu'ni huli eze zuho nomune lamaa' ani' ve. Ne'mine ani'za a'mine luhuvo nite' gizine' gameneu' ingine geni ngebelavo Izesu' evenele zuho minadoti' huli gohi Zuda monokuko tine' mili vilisa ga'ine gilani' giline!. Laza gilune' nene Zuda ve linge malite ti' li go'ine izangumu' Izesu'ni huli vilisa ani' noloseive lo gele none: Ve naba Mose' ne'mo O'mosolati' dani' mono' ado' O'moso'mo ngimiselavo angelolite igi li ngolo' lani' mono' nene huli mono' ado' mono' numu've nomine' ido' engito'

medeli mini O'moso inite' lehizi-daa' ave'ine nizamani' ido' inite' oloku' gizi O'moso imaa' monovo'ine nomine' mono' nene e'metani'. Ido' gizebo ve'ine naba nene ado' lihimelo' ve goloso lohoto' zalo' bili hilave ne neive li li-ngidaa' ani' noloseive.

A'mine luhuovo nite' gizive'mo lo-ngimine' gamazi maloti' nene ti' lo gele none: Evene' malite ne'mine li go'ine izi nilizahe izami nilizahe nesi nene ingine engi' ga'ningu' ne'mine li gilani' noloseive lo gele none. Ido' ne'mine lo gele none' nene aza ti' lo lo-ngimidoti' nene gele none: Laza Izesu' evenele zuho nete a'mine Zuda velite di nizani' inite' nene ivile' ivosa do none. Izesu' aza O'moso'mi gipele mino ido' ei' gidini gehepeve neine' nene ngelebzine' ve. Ha O'moso'mi gonou' ve ado' angelo' nesi ido' Mose'ine nesi nene ngivile' ogosa naba gehepeve neive. Ido' Kilisito' aza eveneto' medelo mino O'moso inite' lehize-daa' ivesi mino Aloni' a'vopilemo' zuholite eveneto' medeli mini O'moso inite' lehizi-daa' aveliti zuhouti' minamine'za engi' ngivile' ogo O'moso inite' lehize-daa' ive lamine' minine!. Ne'mine ogo aza O'moso inite' lehize-dine' nene engi' lehizi-daa' ani'za a'mine ne'mo lihime'ine mudise ngelo do hulamilido' ogavo nemu' nene gohi lehizi-di gohi lehizi-di iga' ani' ve. Ne'mine iga' ani'za Kilisito' aza ei' oko'no hulo O'moso lehize-dine' ne'mo mudise lihimete vai' do hulo-ledelido' gehepeve minine' nenako a'mine oko'no nene gohi hulo lehize-delido' minamine' ve. Ido' O'mososi Zuda vesi bizi minilizani' aka nene O'moso'mo Mose'ni elebizavo Mose' do soto' o-ngidine' nene minevo' minevo' ogo minamine'za O'mososi bizo minelone' aka Kilisito' do soto' o-lidine' nene minevo' minevo' iline' aka mino a'mine akamu' O'moso'mo lo huko-lidine' gamazi ne'mo nene Mose' do soto' ine' akali'mi gamazi nene ivile' ogo lamine' neive. Ido' Zuda veliti mono' numuno naba nene ha O'moso opo'ni laa' numuno gehepeve ado' Okulumo' ne'mi avazahavo' ne neive. Ido' a'mine Zuda velite mono' numungu' nene haza evenelite O'moso'mi mo'mosi've minidaa nene dizamilizave li li hukani' ve. Ne neine'za Kilisito' hilidi'mo nene O'moso neido' gehepeve Okulumokuko voloningumu' aka vele-ledave. Ne'mino neine' nenako nemu' nene lingine Kilisito'nido' gili ele'vole' iga' nanitine nene hulami ezelo' gili ele'vole' igivo' minilo lo mene luhuovo nite' gizive'mo line!. Ne'mine lo O'mosomu' gele ele'vole' ogali'mi monovo ngelebzileesa evene' ato' ato muki' O'mosomu' gili ele'vole' adotil' igi mili ani' inite' mukikumu' nene lo-ngimine!. Nemu' Izesu' ine' initekumu' gatine gilivo' mini eze evenele zuho lili' igi minangutu' nene huli heta limi vamilo line!. Mulumo geni daa' noune' nene O'moso'mo evene' lisihe' lamine' minilizave lo do lisihe' o-ledaa' neine' aka ne neive. Zou lo mino a'mine mulumo geniu' vo holalonidi'mo gihile've nene minevo' alevote vo lamine' iline' ne neive. Ne'mine lo mine lamine' ilizani' akamu' gamazi li'nibe li'nibe vai' lo-ngimine!. Ado' lengiku' honguwo' minivo minilo ido' ge luka neme ne lu'ne gemi li minilo lo nevo'mine gamazi vai' lo-ngimine!. Izesu' aza Zelusalemi ebe' heta hiline' nemu' lo ga'ine ogo inginesi nene Zuda velite ingi minani' ebe' ne'mi heta vi gomu' Izesu'ni ovozo monovo i-dikevo dani' ne'mini inginesi dalizave. Asil'vemukisi ido' eikisi maka' minavemukisi O'mosola lilizave lo lo-ngedo O'mosola lo ti' lo gizine!: Ei' O'moso'mo gildokovo' ilizangisi dalizado' o minine' inite' muki' nene O'moso'mo lehize-ngedelive lo O'mosola lo luhuovo nitoku'

gizine'. Ne'mine ogo Timoteo' nala' numungu' minidotil' nene imisele hulani' gamazi lo-ngemo no'noho' gamazitunu' luhuvo nite've nene gize osu' line'. A'mine luhuvo niteku' nene Kilisito'ni mehe'ine imi huli-di vaa' navelo' soto' o-ngedeline' initekumu' hungo' vai' ngemo Kilisito'nimu' gili ele'vole' ani' nene hulikelizave lo gamene vai' lo-ngidine'.

**O'moso'mo Gipeleine Gamazi Do Va'va' O-davo
Gamazi've Lamine' Lo-limine'**

1 ¹Gozopo' nene O'moso'mo gamazi've avotemotine lo-ngemelesa nene ato ato' gameneu' monovo do ato ato' ogo polohetela molavo ingine avotemotine li-ngimi ngimi' i'mi iga' ani' ve. ²Ne neiha gamene alinge' idise mene none' gamenela nene O'moso'mo gamazi've nene leli' lo-lemelesa ei' gipele neve imiselavo ogo lo-limine' ve. A'mine gipele nene inite' mataliti me'nibo minelive lo ele'mize molo ei' gipelelo' a'mine inite' mata' muki' nene do soto' ine' ve. ³A'mine gipele neve O'moso'mi monovo danava've atoli'mine goloso ogo lamine' neine' ne'mi gihile've gehepeve mino O'moso'mi emeni dameni ne'mido' lisih'e' gehepeve o minive ne neive. Nemu' a'mine gipele ne'mo ei' amuzo'velo' molo gele mino laa' neine' gamazi ne'mo nene inite' mata' muki' nene hize ele' ivo laminekovo' minaa' neive. Ido' aza nene goloso initete apase-ledaa' aka've vele osu' lo-ledo veleta ve Guvelesi ve naba eitoti' lemo minive nenako ana hulaa' ida minine' ve. ⁴Mino O'moso'mi gipele ve li li-dani' gulive've ne'mo O'moso gelekele' i-di gono've di-daa' ave angeloliti gulive'ine nene ivile' ogo mino a'mine votigilelo' lisih'e' ogo ngivile' goloso ogo dizosa neive.

**O'moso'mi Gipele'mo Angelo' Muki' nGivile'
Ogo Osu' Lo Neingumu' Line' Gamazi**

⁵Ee, O'moso'mo gipelemu' line' gamazi nene angelo' hamokumukisi ma lo-ngedamine' nenako ne'mo nene aza angelo' ngivile' ogo dizosa neive. O'moso'mo ezemu' ti' lo line' mono' godolou' gizi nizani' ma neive:

Idise naza gei' maho lolol' ogo
neni' gipe'ne gei' nene nane lo do ote-giduvoni' ve.

Ido' ma line' gizi nizani' ma neive:

Naza nene ei' giduve melehine minekuvo
Eze nene neni' gipe'ne minelive.

⁶Ido' O'moso'mo gana' gipele nene misubouko imiselelesa gohi line' gamazi ma ti' li gizi nizani' ve:

O'moso'mi angelo' muki' ingine gubi' izi imi opo'ni lilizave.

⁷Ido' angelo've ingine gelekele' i-di minaa' avemu' nene O'moso'mo gamazi ti' lo line' luhuvo gizi nizani' ma neive:

O'moso'mo lavo

ei' angelo've nene hepe' ngemeni dameni di otuhaa' nave.

Ido' lavo

a'mine gelekele' i-daa' ave nene

olo' gulumo ne'mine ngemeni dameni di otuhaa' nave.

⁸ Ne'mine o neine'za gipelemu' neve mono' godolou' ti' lo line':

O'mosoo, gaza gizebo oga' mo'mosikau' gizebo ogo mineline' nene huko vamo minevo' minevo' ogo mineleseive.

Mineleseinako Guvekasi ve lolo' ogo mineline' ne'mi monovo nene monovo do lisihe' oga' monovo nene mineleseive.

⁹ Gaza nene monovo lisihe' laminetokovo' luka molo mino

goloso inite' daa' monovomu' gosele' gebelavo mehenga emaa' nane.

Ne'mine oga' nane' nenako

O'moso gei' O'mosoka ne'mo eveneka ngivile' ogo gaza golize izo
mineline lo

a'mine mo'mosito' nene gele'mize molave.

¹⁰ Ido' ma nene O'moso'mo gipelemu' Guvekasi ve lo-do ti' lo lo neine' ma neive:

Guvekasi ve, gaza gana' nene me misubo do soto' molanivo
amuzo molo ha neive.

Ido' Okulumo' nesi gei' angadunu' lolo' aine' ve.

¹¹ Ne neiha a'mine inite' nene vi osu' lulisasine'za
gaza nene minevo' minevo' ogo haza minaa' nane.

Ido' okulumo' misubo nene eveneliti oko'nido' inite' hulupovo ili
goloso iga' nani' ne'mine ilisasive.

¹² Ido' a'mine okulumo' misubo nene litehe inite' di gangi milani' ma'mino
gango moloko gosoho' ha do soto' olosaba gaza neve ha minevo'
minevo' ogo hazavo' nanivo

kilisimasi nene ogo voka' voka' ogo mineline' nene osu' lamoloseive.

¹³ Ido' gipelemu' ti' lo line' gamazi ne'mino nene angelo' hamokumukisi
lo-ngemesa'mive:

Nezeloti' gei' nene nange. A'ne hulaa' uvoda nene minezo.

Mine do vo nanivo biluvaka nete gelekele' i-gidi minilizave lo
gizengau' do'mo leme-ngedelesuve.

¹⁴ Ne'mine ma lo-ngedes'a'mine' nenako angelo' ingine gipele ne'minisa
dizi minami ha Okulumo' ngemeni damenisi O'moso'mi gelekele' ve've
minikevo O'moso'mo do lu' izelesa lele'mize molave leli' nene hize ele'
i-lidilizave lo ngimisela' neive.

**O'moso'mo Do Lu' Izaa' Neine' Nemu' Nene Inite'
Naba Ve Lo Gele Mineloningumu' Lo-ngimine'**

2 ¹ Ido' mono' gamazi nogilune' nene angelo' ngivile' ogo dize
minive O'moso'mi gipele'mo lo-limine' gamazi nenako nemu' nene

a'mido' e'meto novube lo zovo' izo mala valonge. A'mine nogilune' gamazi lamine' mene lute gate molo gele lamine' o mino e'meto volone. 2 O'moso'midati' gamazi ha angelolite lani' gamazi Mose' gizine' ne'mo nene amuzo'vesi miningumu' a'mine gamazi nene ma avuto' igi gili hulave engi' nene a'mine gamazi avuto' ani' votigilelo' nene di mili lihime ngimi mulumo inite' di-ngidaa' ani' ve. 3 Ido' a'mine amuzo've ngomosi minine' gamazi avuto' ave nene mulumo nite' ne'mine di-ngidaa' ani' nenako a'mine Mose' gizine' gamazi ivile' ogo dizo minine' inite' naba O'moso'mo lihimete hulo-ledo do lu' izeline' akate vele-lidine' ne'mi gamazi nene gilube gelamube ogo minelone' nene O'moso'mo lihime lemo mulumo nite' naba do-ledeleseive. Ido' a'mine mulumo nite' naba do-ledelinguti' nene mo ngelo olovo' amolosune. Ido' a'mine O'moso'mo lihimete hulo-ledo do lu' izeline' gamazi nene Guvelesi ve asi've ganatilise lo soto' ivo eze veleti' gilave nete lezela li hulani' ve. 4 Ido' lezela nili hulavo a'mine gamazi nene lamine' ve li ningilizave lo O'moso'mo ei' gala gilido' do molo ato' suno ogo amuzo malehe inite' ato atoli'mine do soto' ogo ido' a'mine gamazi li-limave nene Sikalahu'velati' amuzo ato ato' lehize-ngedo minine' ve. Ido' O'moso'mo ne'mine ine' nenako nemu' nene a'mine lihimete hulo-ledo do lu' izeline' gamazi nene lamineto' mo inite' naba goloso neive. Nemu' nene lute gate molo gele lamine' o mino e'meto volone.

**Gomu' Molo Lemo Akate Velo Do Lu' Izaa' Ivete Aza
 A'mine Gono Dalido' Lisih'e' Ogo Minelingumu' Ve Lo
 Aza Ei' Evenele Zuhu Leli' Okode Ne'mine Do Otuho
 Mulumo Alumo Gelo Hilin'e' Ve Lo Lo-ngimine'**

5 Ido' idise lo-lingimuvoni' nene monovo gosoho' soto' ilingu' vi hilalizani' alevemu' nene lo-lingimuvoni' ve. Ido' a'mine monovo gosoho' soto' ilingu' vi hilalizani' aleve nene angelo' engito' neve gelekele' i-ngidi minikevo gizebo i-ngidilizave lo O'moso'mo ma lo-ngedamive. 6 Ido' mono' godolou' gamazi ma ve mali'mo O'moso lo-imine' gamazi ma ti' lo gize neine' ma neive:

Laza evene' ngomo haza nite' none' lelikumu' nene
 gaka gelo minelinido' minamane'za
 aizo, lelikumu' nene gaka gelo minaa' nane.
 Ido' evene' lemeni dameni nene lamine' amivo
 gaza gizebo o-ledelinido' minamane'za
 gaza nene ha gizebo o-ledaa' nane. Ido' ne'mine o-ledaa' naningumu'
 nene naza aizo lo gelekuve.

7 Evene' nene angelo' engitoti' gamene li'nibevo' lemeti' igi minilizave
 lo
 gaza evene' nene angelototi' do leme-ngedo molo-ngede nane.

Gaza evene' nene do hozi lo-ngedo guve'inesi ve lolo' o-ngedane.

⁸Ido' ne'mine o-ngedo evene' nete

inite' mata' mukito' gizebo igi minilizave lo

a'mine inite' mata' muki' nene eveneliti gize'ingu' do leme-ngedaa'
nane.

Ee, O'moso'mo inite' muki' nene eveneliti gize'ninguko do leme-ngedo molave. Ne'mine ogavo inite' hamokisi evenelite gizebo amilizave lo molani' inite' nene ma nizamave. Ne neiha idise gameneuko ningaa' noune' nene inite' muki' nete evene' nene olihe gelekele' i-ngidi osu' lamavo ningaa' noune. ⁹Ido' ningo gelaa' noune' nene O'moso aza angelototi' gamene li'nibevo' lemeti' ogo minelive lo angelototi' do lemeti' ogo hulo-dive Izesu'nimu' nene ningo gelaa' noune. Ee, O'moso'mo nasahili' o-ledo evene' mukikumu' helelive lo imiseline' ve. Ido' a'mine ve Izesu' nene mulumo gelo hilingumu' ve lo O'moso'mo do hozi lo-doo Guvelesi ve lolo' o-dine' nemu' nene mo ningo gelaa' noune.

¹⁰Ido' O'moso'mo Izesu'ni imisel o mulumo alum o gelo helelive line' nene nanitekumu' ve. Izesu' nene do lu' izeline' gono dalido' olihe lisihe' gehepeve amo minine' nenako nemu' mulumo alum o gelo heleline' ne'mo a'mine leli' do lu' izeline' gono nene dalido' do lisihe' gehepeve o-delingu mu' mulumo alum o gelo helelive lo O'moso'mo imiseline' ve. Ido' izipahala vai' lele'mize molo atoli'mine ogo do lamine' o-ledelesa gono do'mo vo mininguti' nene O'moso aza leli' gomu' molo lemo akate velo do lu' izelive Izesu' mulumo alum o gelo helelive lo imiseline' ne'mo nene monovo do lamine' goloso ine' ve. Ee, inite' mata' muki' ei' inite've eikumukovo' mini di dizilizave lo do soto' molave evene' naba O'moso aza Izesu'ni nene do lu' izelido' do lisihe' o-delesa mulumo alum o gelo helelive lo imiseline' ne'mo nene monovo do lamine' goloso ine' ve. ¹¹Ido' evene' lute noso izo gilito do lamine' o-ledo do O'moso'mi evenele lolo' o-ledaa' ivesi ido' lute do lamine' o-lidine' alevesi leli' meteho nene hamo' minine' aleve none. Nemu' aza lelikumu' nene nen'i aku'ne alu'ne zuho nizave lolosa ovozo helesa'mive. ¹²Ido' aku'ne alu'ne zuho ve line' nemu' mono' godolou' O'moso lo-imine' gamazi ma ti' li gizi nizani' ma neive:

Naza nen'i aku'ne alu'ne zuho nene gei' guliveka nene lo soto' o ngemo
gei' guliveka do hozi lo leli' zuholiti muliseu' nene nama lolosuve.

¹³Ido' leli' eveneliti lemeni damenisi minelingumu' line' gamazi gohi ma ti' li gizi nizani' ma neive:

Naza O'mosomu' gele ele'vole' o mino eito' lehete o minelove.

Ne'mine lo gohi ma ti' lo line' ma neive:

Ido' naza nene O'moso'mo neze izipaha'ne zuho nimine' mesi none'
ningilo.

¹⁴⁻¹⁵Ido' a'mine izipahala zuho laza nene hele vaa' okodesi none'
nenako a'mine'mine ogo Izesu' aza heleline' ne'mo helaa' amuzo do

minive Satani nene do goloso o-do ido' helakumu' ngehelele izaa' ne'mo gesi hizo hulo lulou' o-ngedavo ngehelele izaa' lulou' minave nesi nene aza helosa gesi kele hulo-ngedelesa hele vaa' okode ne'mine do otuho minine' ve. ¹⁶ Ido' ne'mine ine' nene angelo' aleve do ngu' izo ne'mine ine' nevoba mono' godolou' Abalahamu' a'vopilemo' zuho do ngu' izaa' neive li gizi nizado' e'meto ne'mine ine' ve. ¹⁷ Ido' nemu' nene eveneliti lihimete apase-ledelesa leli' hele vaa' okode ne'mine do otuho nakunolo alunolo zuho leli' gehepeve ne'mine lolo' iline' ogavo ido' eveneto' medeli mini O'moso inite' lehizi-daa' ave naba nete eveneliti lihime apasaakumu' gono daa' nanako ne'mine ve lolo' ogo evene' muhelete ningi O'moso'mi velelo' monovo lisihetoti' O'moso'mo lidokovo' gono dalosa eze akunolo alunolo zuho leli' gehepeve ne'mine lolo' iline' ogavo lolo' ine' nenako aza nene leli' gehepeve ne'mine lolo' amidiniko a'mine gono nene dalido' lisihe' mo amidine. Nemu' nene leli' gehepeve ne'mine lolo' iline' ogavo lolo' ine' ve. ¹⁸ Ee, ido' emengu' milangu' mulumo gelo minine' nemu' nene mo ningi gele neine' nenako ve ma ingine ngemengu' nimilavo minilizani' aleve nene hize ele' noo-ngedo alete molo-ngedelido' o neive.

Izesu' Ne'mo Mose'ni Ivile' Ogo Dizosa Miningumu' Lo-ngimine'

3 ¹Nemu' nene neze zuho, O'moso'mo ei' ve lo Okulumoku'
3 voloningumu' lengele'mize molave lingine nene leli' monoku'
 nene O'moso'mo ei' velemu' ogo imiselavo ave aposolo mino eveneto'
 medeli mini O'moso inite' lehizi-daa' ave naba ne'mine minive naba
 Izesu'nimu' nene gatine gili minilo. ²Mose' aza O'moso'mi zuhola gono
 dangu' nene O'moso'mo lo-didokovo' e'meto monovo've lisihetoti'
 gono do do vine' ne'mine ogo Izesu' aza nesi a'mine'mine ogo gonolo'
 ele'mize molave O'moso'mi gamazi've nene ivile' amo lo-didokovo'
 e'meto monovo've lisihetoti' gono do do vine' ve. ³Ido' evene' zuho
 maliti me'nibi guvele ne'mo a'mine zuholiti guve'ine nene ivile' ogo naba
 minaa' neine' ne'mino Izesu' gulive do hozi lolone' nene Mose' gulive
 do hozi laa' noune' nene ivile' ivosa do hozi lolonido' lisihe' o neive.
 Ido' lisihe' o neine' nenako nemu' nene ezemu' gatine gili minilo. ⁴Ido'
 ne'mine lo O'moso'mi evenele zuholiti me'nibo nene Izesu'nimu' luvon'i
 giline' nenako nemu' nene lo-lengemelove. Evene' zuho ato ato' di soto'
 i-ngidave me'ninge nene minamani' nevoba ha minani' ma neive. Ha
 minani'za a'mine inite' mata' muki' do soto' molave nene O'moso'movo'
 do soto' molani' nenako ei' hamo' nene me'nibo neive. ⁵Ido' Mose' nene
 O'moso'mo lo-didokovo' e'meto monovo've lisihetoti' O'moso'mi zuhola
 gono do do vine' nene ha O'moso'mi gelekele' ve'vevo' mino O'moso'mi
 gamazi've alinge' soto' ilingumukovo' gamazi lo ngeme ngeme' ogo
 gono do do vine'za ⁶Kilisito' aza neve O'moso'mo lo-didokovo' e'meto
 monovo've lisihetoti' gono do do vine' nene mo O'moso'mi gipele mino

eze zuholo' gizebo o-ngede mino gono do do vine' ve. Ido' eze zuho ve luvoni' nene laza Kilisito' do lu' izelive lo ezemu' gele ele'vole' o mino lolize izaa' noune' monovote nene ma hulamoso' a'mine zuho nene leli' minelesune.

**Mose' nGele'mizo Vive Muki' Inginge O'mosomu' Gili
Ele'vole' Ami Mehe'ine Imi'mi Vadi'mo Mine Gelaa' Ebe'
nGemelesa Ingu' Nene Vi Hilamani' Nenako Nemus' Leli'
Nene Ehe' Ogo Mineloningu' Lo-ngimine'**

7-8 Nemus' nene laza O'moso'mi Sikalahuli'mo gamazi ma ti' lo line'
mamu' nene gele dalone:

Mose'aza ebe' hadivela ngele'mizo novivo
O'moso golo izani' gameneu' evene' ingine
O'moso'mi gamazi've gili huli gili dalisa gilami
a'manapa igi minani' ne'mine igi minami
lingine ei' nolo've idise a'mene ma nigili ma
lutine di a'manapa igi gili hulamilo.

9 Ido' a'mine ebe' hadivela nene avotinge ingine
inite' mata' muki' engita ogo molo uvoni' nene
kilisimasi foti (40) ne'mine nene mini ningi minani'za
ningi huli-nidi go'ne izi'mi igi minani' ve.

10 Nemus' nene naza a'mine alevemu' nene mulu'neu' goloso gehepeve
gelo
engikumu' ti' lo luvoni' ve:
Engi' lu'ine ne'mo gamene gamene gopo akalo' vaa' ivo
neze aka'ne nene ningi hulan'i' ve.

11 Nemus' nene nizebolo' molani' nenako naza lamineto' nolo hukuve lo
ti' lo luvoni' ve:

Inginge nene neni' mine gelaa' ebe'neu' nene igi mini gilamilisave lo
noluve.

12 Nemus' nene neze zuhokizo, lengikuti' evene' ma nene lutine golososi
mini O'mosomu' gili ele'vole' ami minevo' minevo' ogo gono daa' ive
O'moso nene mehedine imikelizaze. Ehe' igi minilo. 13 Ido' lengikuti'
evene' ma lingine lutine O'mosola molakumu' lutine a'manapa ogavo
lihime daa' monovo goloso ne'mo lingimimise' ogavo goloso ikelizaze.
Mono' godolou' idise gamene ve lani' nene ha neidokovo' monoku' nene
ne lu'ne do ngi lo-nede ge luka do ngi lo-gede live' minilo. 14 Laza gana'
api' ogo Kilisito'nimu' gele ele'vole' une' nene hulamo do gili' lo nonivo
idise mene none' gamene osu' liline' nene a'ne'movo' Kilisito' evenele
lolo' une' nene gihile minelesieve.

15 Nemus' nene mono' godolou' ti' li gizi nizani' gamazi malo' e'meti
minilo:

Evene' ingine O'moso'mi gamazi've gili huli
 gili dalisa gilami a'manapa igi minani' ne'mine igi minami
 linge el' nolo've idise a'mene nigili ma
 lutine di a'manapa igi gili hulamilo.

¹⁶ Ido' mono' godolou' gamazi idise lo soto' uvoni' ne'mo nene lamineto' ti' lo nolo-limive: Laza O'moso'mi gamazi gele damo mehede emo minelone' nene O'moso'mo mine gelaa' lemelesa neingu' nene ngelo vo holamolosune. Ee, O'moso'mo gamazi nolo-ngimivo gili minisasi a'mine gamazilo' e'metami mehe'ine imave li mono' godolou' gizani' ma nene zamotinemu' luhuvo gizani' neve. Mose' Aigita misubouti' ngele'mizo ani' aleve muki' engikumu' nene luhuvo gizani' ve. ¹⁷ Ido' kilisimasi foti (40) ne'mi lulou' ma nene O'moso'mo zamotinemu' mulunou' goloso gehepeve giline' neve. A'mine hamo' aleve ingine kilisimasi foti (40) ne'mi lulou' lihime di ebe' hadivela hili gesel' ani' aleve engi' nemu' nene mulunou' goloso gehepeve giline' ma neive. ¹⁸ Ido' O'moso aza evene' mine gelaa' ebe' ngemelesa nouvongu' nene ingine mini gilamilisave lo evene' zamotinemu' lo huko line' ma neve. A'mine hamo' aleve ingine O'moso'mi gamazi gili huli mehe'ine imave engikumu' nene mine gelaa' ebe' ngemelesa nouvongu' nene igi mini gilamilisave lo lo hukine' ve. ¹⁹ Nemu' nene ingine O'mosomu' gili ele'vole' ami mehe'ine imaa' ani' monovo'ine ne'mo nene mine gelaa' ebe' ngemelesa ingu' nene vamani' ve lo mo ningi gele none.

4 ¹ Ido' nemu' nene O'moso'mo evene' ma ingine mine gelaa' ebe'neu' nene vi hilalisave lo lo hukine' gamazi nene olihe ogo gihile izamivo a'mine'mi aka'vesi olihe tilamido' nene O'moso'mo lengikumu' gala gelosa lengikuti' evene' mamu' mo aka ivile' ikenako a'mingu' mo keke' vi hilamilisave lo gelalize. Laza ehe' ogo golise gelo minelone. ² Ido' laza ehe' ogo golise gelelone' nene nanitekumu' ve. Mose' miningu' minani' aleve mono' gamazi lamine' li-ngimani' ne'mine igi lezesi li-limikevo none. Ido' a'mine mono' gamazi lamine' nene li-ngimi ngimi' avo gilani'za ingine a'minemu' gili ele'vole' igi e'metisa'madi'mo engita vo gihile izamo hize ele' o-ngedamaa' ine' ve. Nemu' nene laza engi' ani' monovo nemu' gelo golise gelo ehe' ogo minelone. ³ Ido' O'moso'mo ezemu' gili ele'vole' ami mehe'ine imaa' avemu' ingine mine gelaa' ebe'neu' igi mini gilamilisave lo lo hukokuve line' nenako nemu' nene a'nemine ve ingine mine gelaa' ebe'veu' nene vi hilamilizado' mini mili minikevo a'mine mine gelaa' ebe'veu' vo holalonive nene ezemu' gele ele'vole' ogo nonive leli' nene none. Ido' ingine O'moso'mi mine gelaa' ebe'veu' vi hilamani' nene mine gelaa' ebe've nomivosa nevoba asi aza okulumo' misubo do soto' ogo gono do osu' lidoti' nene mine gelo neine' nenako mine gelaa' ebe've nene mo neive. ⁴ Ido' O'moso aza mine gelo neive luvoni' nene O'moso'mo gamene sigisi (6) ne'mi lulou' gono davo

gamene seveni (7) ine' nemu' nene mono' godolou' gamazi ti' li gizi nizani' ma neive:

Gamene seveni (7) ogavo gono've osu' line' nenako
neu' nene api' ogo mine giline'.

5 Ido' mine gelo neive li luhuvo gohi gizani' ma ti' lo line' neuko mo lo-lengemekuve:

Inginge nene mine gelaa' ebe'neu' nene igi mini gilamilisave.

6 Ido' naza gomu' lo-lingimuvoni' gamazi maloti' nene evene' ma ingine O'moso'mi mine gelaa' ebe'veu' vi hilalizani' aka nene ha ngolokovo' lo minivo minine' nenako ido' gomu' minangu' nene mono' gamazi lamine' li-ngimikevo gilave engi' nene a'mine gamazi gili ele'vole' igi e'metisa'madi'mo O'moso'mi mine gelaa' ebeku' nene ma vaman'i nenako 7'a'mingu' vo holalone' gamene ato' gohi ma do kegeso molo-lidine' ve. Ido' a'mine gamene nene idise mine do nodizune' gamene ne neive. Ee, Mose' evene' ngele'mizo vine' gamenelot'i kilisimasi vai' goloso ogo vavo a'mine gamenemu' nene idise mine do noune' gamene ve lo O'moso'mo Davidi' veleu' molavo a'mine lo-lingimuvoni' gamazi ma nene Davidi' ti' lo line' ve:

Lingine ei' nolo've idise a'mene ma nigili ma
lutine di a'manapa igi gili hulamilo.

8 Ido' Mose' helavo Zosuva' ezelo' medelo Kanaha misubou' ngele'mizo vine' mau' nene ingine mine gelaa' ebe' nene dadiniko O'moso'mo mine gelaa' ebeku' vo holaa' gamene ato' gohi mamu' alinge' ma lamidine.

9 Nemu' nene O'moso'mo gono've do osu' losa mine giline' ne'mine ogo eze evenele zuho mine gelelone' gamene nene lelikumu' ha gizebo ogo neive. 10 Ee, O'moso'mi mine gelaa' ebeku' vo holaloneve laza nene O'moso'mo inite' mata' lolo' ogo osu' lo gono've hulo mine giline' ne'mino lazasi gonotesi hulo a'mida mudise aka vo mine gelelesunako nemu' nene O'moso'mi evenele zuho mine gelelone' gamene nene lelikumu' gizebo ogo neive. 11 Nemu' nene laza Mose' miningu' minani' aleve O'moso'mi gamazi gili huli e'metami a'mine mine gelaa' ebeku' vi hilamani' ne'mine ogo engi' ani' ne'mine alone' ne'mo a'mine mine gelaa' ebeku' nene vo holamo zovo' izo mau' vogalonge. Mine gelaa' ebeku' voloningumu' nene O'mosomu' gele ele'vole' ogo eze gamazi've nene amuzo molo gele do vo minelone.

12 Ee, O'moso'mi gamazi ne'mo nene gilizevo ogo haza minamo amuzo'vesi goloso mino gono dovo dovo' ogo mino bainati mite' velela ge'no mehenela ge'no gohe goloso minaa' neine' nene ivile' ogo gohe goloso neive. Ido' bainati mite' nene evene' hize sato sokulu' lo lulou' gehepeve vaa' neine' nene ivile' ogo a'mine O'moso'mi gamazi ne'mo luteu' vodeu' nene hize sokulu' lo vo holosa laza lute gateu' olosa gilune' initekumu' nene ize' molaa' neive. 13 O'moso'mo do soto' molani' inite'

muki' nene haleki minilizado' ma minamavo aza ningesa'mine' inite' nene hamokisi mo keke' nizamave. Ee, leze monovote ize' molo-ledelive ei' velelo' nene inite' muki' hiti minami sotokovo' minaa' nani' nenako nemu' a'mine O'moso'mi gamazi nene amuzo molo gele do minelone.

**Leli' Hize Ele' O-ledelive Eveneto' Medelo Mino O'moso Inite'
Lehize-daa' Ive Nabate Dizo Minive Izesungumu' Lo-ngimine'**

¹⁴ Ido' eveneto' medeli mini O'moso inite' lehizi-daa' ave nabalitevo' mono' numuno nabau' lavolavo izi hukikani' nene di veseme' ili O'moso'mi mo'mosi'vevo' ve langu' diza'a' ani' ne'mine ogo O'moso'mi gipele Izesu' aza eveneto' medelo mino O'moso inite' lehize-daa' ive nabate dizo minive lolо' ogo okulumo' ivile' ogosa hozila O'moso'mi mo'mosi've gehepeve neida Okulumokuko dizo minine' nenako nemu' monote gele ele'vole' une' nene do amuzo molo do ngi lo do minelone.

¹⁵ Ido' monote nene do amuzo molo do ngi lo do minelone' nene eveneto' medelo mino O'moso inite' lehize-daa' ivete naba nene lemengu' ne'mi lulou' mino amuzote nomivo gilizevo ogo nonivo aza nene mulumote ningamo ninge mate-ledaa' ive minine' nevoba lelita lemengu' ato ato' muki' soto' oga' neine' ne'mino ezelasi nene emengu' ato atoli'mine soto' o-dine' nenako nemu' nene leli' mulumote ningelido' lisihe' o neive. Ee, lelita lemengu' soto' oga' neine' ne'mino ezelasi soto' ine'za aza neve lihime hamokisi ma damive. Ido' leli' mulumote ningelido' lisihe' o neine' nenako nemu' nene monote nene do amuzo molo do ngi lo do minelone.

¹⁶ Ido' eveneto' medelo mino O'moso inite' lehize-daa' ive nabate ne'mo leli' mulumote ningelido' lisihe' o minive aza nene O'moso neida leli' gamazite hize ele' olosa vo neine' nenako nemu' laza geni lebeleli gameneu' nene O'moso'mo isete izo ido' nasahili' o-ledo ha hize ele' o-ledeleseive lo a'mine geni lebeleline' inite' nemu' nene lovo' kiselevo' ogo lo-emeso' nene O'moso aza mo'mosi'velo' mino gizebo o-ledo nasahili' o-ledo minaa' neingumu' nene ha lo-emelone.

5 ¹ Ido' ne'mino geni lebeleli initekumu' O'moso lo-emelone' nene eveneto' medelo mino O'moso inite' lehize-daa' ive naba'mi monovo ti' lo neingumu' nene gelo ma ne'mine ha olosune. Ne'mino neive: Eveneto' medeli mini O'moso inite' lehizi-daa' ave muki' ngele'mizi milika' milika' iga' nani' nene sipisipi nevo'mine inite' lihimete apase-ledelive li O'moso imilisa di ani' nene ngibili O'moso imani' inite' ato ato' muki' nesi oloku' gizika' gizika' igi minilisa evene' lelikumu' ve li O'mosola gono di hizi ele' i-lidilizave minilizave lo O'moso'mo lido' igi evene' engikuti' nene ma ngele'mizi milaa' nave. ² Ido' a'mine eveneto' medeli mini O'moso inite' lehizi-daa' ave naba nene haza evene' mini inginesi nene evene' muki' amuzote nomine' mino aka laminetoti' zovo' izo vaa' noune' ne'mine nene ha ilizado' o neine' nenako nemu'

nene mono' gili lamine' ami zovo' izi vaa' nani' ne'mino lazasi zovo'
 izo vunidine li ne'mine ani' aleve nene mulumo'ine gili hongu monovo
 ngelebizilizado' o neive. ³Ido' a'mine eveneto' medelo mini O'moso inite'
 lehizi-daa' ave nabasi nene amuzo'ine nomine' mini zovo' ha izi vilizado'
 i nizani' nenako nemu' evenekumu' nene lihime'ine apase-ngedelive li
 sipisipi nevo'mine inite' ngibili oloku' gizi O'moso imilizani' ne'mine igi
 angise'inemukisi ma imilizani' o neive. ⁴A'mine eveneto' medelo mino
 O'moso inite' lehize-daa' ive naba'mi gono nene dizosa neive. Ido' a'mine
 gono dalisa nene ve malite engi' lu'nido' di mili ma disa'mave. O'moso
 asi've nene Mose' uvoloho Aloni'ni nene do ote-davo ne'mine gono dani'
 ma'mine ogo evene' ma do ote-ngedavo a'mine gono nene daa' nave. ⁵Ido'
 Kilisito' nene a'mine'mine ogo ei' gala gilido' do molo ei' oko'no do hozi
 lo eveneto' medelo mino O'moso inite' lehize-daa' ive naba lolo' amine!
 Asi O'moso ne'mo ele'mize nomolo ti' lo lo-dine' ve:

Idise naza gei' maho lolo' ogo nen'i gipe'ne gei' nene nane lo
 do ote-giduvoni' ve.

⁶Ido' mono' gamazi gohi mauti' Kilisito' nene Abalahamu'ni no'noho'
 ize-dive Melekisedeki' gono daa' ine' ne'mino a'mido' medelo do
 mino eveneto' medelo mino O'moso inite' lehize-daa' ive minelive lo
 Kilisito'nimu' ti' lo line':

O'moso nen'i nimani' inite' nene Melekisedeki' gono daa' ine'
 monovolo' ogo
 eveneto' medelo mino inite' lehize-nedaa' anive
 minevo' minevo' ogo minelesane.

⁷Izesu' aza misubouko ve lolo' ogo minine' gameneu' nene aza helaa'
 akalo' novinguti' do ti'ne-do do u' izeli amuzo'vesi minive O'mosola nene
 vise naba' naba lo ido' O'mosola loo veleti' ive novozo limine'. Ne'mine
 ogavo aza oko'no do'mo lemo gelekele' o-nedaa' ingumu' ve lo O'moso'mo
 gele imine'. ⁸Aza nene O'moso'mi gipele minine'za mulumo alumo giline'
 ne'mo nene O'moso gelekele' o-daa' monovomu' nene gele ngolo' lo
 giline'. ⁹Ido' ne'mino gele ngolo' lo gilidi'mo eze nene gono dalido' lisihe'
 gehepeve ogo mino gelekele' o-daa' unive mukikumu' nene minevo'
 minevo' oloningumu' ve lo mudise do lu' izaa' ne'mi meleho nene aza
 lolo' ogavosa ¹⁰O'moso'mo gaza nen'i nimani' inite' nene Melekisedeki'
 gono daa' ine' monovolo' ogo eveneto' medelo mino inite' lehize-nedaa'
 anive naba minelesane lo ele'mize molani' ve.

Mono' Hulikelizave Lo Ga'ine Do Gazine' Gamazi

¹¹Ido' a'minem'u' gamazi lo-lengemeloni' nene vai' goloso neine'za
 gatine gohi duu lo vivo nizani' ne'mo nene lo ngolo' lo lo-lengemelesa
 ge'nebe olosuve. ¹²Ido' ge'nebe oloni' nene lingine Kilisito' evenele lili' igi
 gamene ha'na minani' nenako idise mene evene' ma mono' monovo apizi

ngimilizado' i minilizanako ne'mine ami ve malite O'moso'mi gamazi
nili-lingimavo gohi api' igi bina gili'mi gili'mi dizi alizado' mini mili mini
mono' gamazi amuzo malehe ma gilami izipe amine naa' nani' ne'mine
lapa nomine' gamazi neeve' nene gililizado' i nizani' ne'mo nene ge'nebe
olosuve. ¹³Ee, ingine amine naa' nave muki' nene ha izipe ngomo ne'mine
nene nizanako ne'mo nene monovo lisiheli'mi gamazi've nene ningi di
kegesami ladenivo' igi minaa' nave. ¹⁴Ne neiha lute'mi amuzo malehe
noso' nite've nalizani' nene lute gate do lamine' olone li di ningi' ningi'
igi monovo lisihekisi golososi ningi di kegesisa monoku' lodive igi nizave
engikovo' nene amuzo malehe noso' nite' ne'mine nene ha nalisave.

6 ¹⁻²Nemu' nene lu'ine do ngi lo-ngedelingumu' ve li Kilisito' evenele
idi'ne a'mene lili' ave gana' apizi ngimaa' ani' gamazi ado' lu'ine
di velepe' izi labuluvo oga' akau' ngele'mize molaa' neine' monovo nene
hulaakumu' gamazi nesi ido' O'mosomu' gele ele'vole' ogali'mi gamazi
nesi mono' noso holaa' monovo ato atokumu' apizi ngimaa' nani' gamazi
nesi ido' a'ine evene' godo'nido' hitaa' nani' monovo ne'mi gamazi nesi
ido' hele noloninguti' otaa' ne'mi gamazi nesi ido' O'moso'mo goni'
o-ngedo lihime ngemelive mulumo alumo gili minivi' minivi' ilizani'
gamazi nene gohi gelo gohi gelo minune' nene hulo gamazi monoku' do
lodive o-ledeline' gamazi ma atokumukisi imine' molo gelo minelone.
³Ido' gamazi gohi ma monoku' do lodive o-ledeline' gamazi mamu'
imine' molo gelo gelo mineloningumu' nene mo O'moso'mo gele lemavo
ma mo ne'mino imine' molo gelo minelone. ⁴⁻⁶Mono' ne'mo ve ma
ingine lu'ine hize labana' ele-ngedavo O'moso'mo eze evenele lehize-
ngedaa' inite' nene lehize-ngedavo ne'mi lanite've gilaa' ido' O'moso'mi
Sikalahu' engita ogavo minaa' ido' O'moso'mi gamazi nene lamine' neive
li ne'mi lanite've gilaa' ido' alinge' gamene naba soto' iline' ne'mi amuzo
engita soto' ivo lanite've gilaa' ave ingine ne'mine ve mono' mehe'ine
imi hulilizani' ne'mo ingine O'moso'mi gipele nene lohoto' zalo' gohi
bilani' gelavo evene' muki' eze di u'musupo lizi-dilizani' monovo di soto'
ilizani' nenako ne'mine igi nizadot'i laza engi' nene lu'ine di velepe'
izilizani' akau' ngelo ngele'mize tine' molamolosunako nemu' nene lutine
di velepe' izilisave li gana' api' igi li-lingimaa' ani' gamazi bina nene
hazamu' gohi lo gohi lo amo gamazi gohi mamu' imine' molo lo gelo
minelone. ⁷Ee, goline nene misubou' izeka' izeka' ivo misubo ne'mo ge'no
nosa a'mine misubou' gono daa' ave nene do lamine' o-ngedeli noso' nite'
nene do soto' oga' neine' misubo nene O'moso'mo no'noho' izo do lamine'
oga' neine' ne'mino aza evene' ma engita eze gamazi limine' nene gili
ne'mi gihile've monovo lamine' di soto' ilizave nene no'noho' ize-ngedaa'
neive. ⁸Ido' a'mine misubo ne'mo goline nene ge'no noosa a'mingu' nene
gasavasi lilihe golosovo' do soto' iline' nene O'moso'mo a'mine misubo
nene gohi ma do guno amoso' ogave lo usi' ize-delido' o neinako a'mine

misubou' nene olo' enge vite' oloseinako nemu' nene O'moso'midati' gamazi nene engita lemavo mo gilisa monovo lamine' di soto' ami mudise mehe'ine imilizave nene mo oluku' vilisave.

⁹ Ne'mine ve nene oluku' vilisave luvoni'za lu'ne lengeme nouvoni' aleve lingine nene oluku' vaa' akalo' vilizave lo gele minosa noluvoba lengi' do lungu' izine' ne'mi gihile monovo lamine' nene lengita soto' o do vo minelive lo gele minosa nene noluve. ¹⁰ Lingine O'mosola lutine mili minadi'mo lingine ei' evenele nasahili' i-ngidaa' nani' monovotine nene lengita neivo ne'mine i di vi minaa' nani' ma neive. Ido' lingine ne'mine igi minaa' nangumu' nene O'moso aza gala molavo lengele'mize lamine' amidiniko eze nene monovo goloso oga' ive ne'mine minidine. Ne'mine idine'za monovo goloso oga' ive mines'a'mine' nenako lingine ne'mine igi minaa' nangumu' nene gala molavo lengi' nene lengele'mize lamine' amilivoba ha lengele'mize lamine' oloseive. ¹¹ O'moso'mo gamene nabala inite' lamine' lehize-ledelesive li a'minem'u gapepe' igi minaa' nani' inite' nene dalizangisi lingine hamo hamo' a'mine igi mili minani' monovotine ne'minevo' nene igi mili mini amuzo mili minilizave lo gelo noluve. ¹² Ido' evene' malite gosele' ngebelamivo O'mosom'u gili ele'vole' igi mini igi mili minaa' nani' aleve nene O'moso'mo eze evenele lemelove lo lo huko salani molo-lidine' inite' nene daa' nave. Lingine a'mine'mine igi monokumu' gosele' lengebela' ive lili' igi minami a'mine aleveti monovo'nido' nene nge'meti nivi igi mili minilizangumu' ve losa lingine O'moso'mi evenele nasahili' i-ngidi minani' monovotine ne'minevo' nene igi mili mini amuzo mili minilizave lo gelo noluve.

**O'moso'mo Lemelove Lo Salani Molo Lo Hukine' Gamazi Nene
nGelo Vo Haza Amoloseive Lo Gele Mineloningu'mu' Lo-ngimine'**

¹³ O'moso'mo salani molo-ngidine' inite' daa' nave luvoni' nene Abalahamu'ni salani gamazi lo molo-dine' nene gihile izingumu' luvoni' ve. Evene' eze O'moso ivile' ogo minive ma neivosa a'mine ve'mi gulivel'o salani gamazi lo huko lilive ma minamivo O'moso ei' gulivel'o' salani gamazi ti' lo lo hukine':

¹⁴ Neni' nene no'noho' ize-gedekuvo
ga'vopilemo' vai' goloso soto' igi mini di vilisave losa
neni' noluve.

¹⁵ Ti' lo lo huko-dine' nenako a'mine nene geto gihile izamingumu' nene gosele' belamivo ha gele ele'vole' ogo gizebo ogo hazavo' neivo a'mine O'moso'mo lo huko-dine' gamazi nene Isaka'ni gedavosa api' ogo gihile izine'. ¹⁶ Evene' ingine nene gamazi lamine' nolune li engi' ngivile' ogo minive ei' gulivel'o' likevo ne'mo evene' ingine lani' gamazilo' nene ve malitesi e'menga a'manga lisa'mave. Nemu' nene O'moso'mo gamazi lo hukine' nene ei' gulive'velo' lo huko line' ve. ¹⁷Ee, O'moso

ei' nene izipahala zuho leli' do lemelove lo lo hukine' initekumu' nene lulo do velepe' izo lemamilihe li gilikelizave losa a'mine line' gamazi nene mo lamine' lave li gililizangumu' nene amuzo molo gele mino ei' gulive'velo' lo huko line' ve. ¹⁸Ido' init'e sita' a'mine gamazi lo huko line' nemukisi ido' a'mine gamazi lo huko lingu' nene ei' gulive'velokisi line' nemukisi nene aza lulo do velepe' izo mo amolosuve lo soza ngelo lamoloseive lo gelelone' ne'mo lute do amuzo goloso molo-ledavo laza alete molo-ledelive lo eze gizebo ingu' vo hulunive laza a'mine lo huko-lidine' init'e nene alinge' mo do soto' o-ledeleseive lo gapepe' ogo gizebo minaa' noune' nene hulamo do gili' lo do minelone losa a'mine gamazi nene ei' gulive'velo' lo huko-lidine' ve. ¹⁹Ido' a'mine initekumu' gapepe' ogo gizebo minaa' noune' ne'mo nene lute do gili' lo-lede mino mo apasamiline' init'e sipi vo mala valive li di gili' li-daa' ani' init'e ne'minosa mo apasamiline' init'e nenako lute nene ngelo vo mala vamoloseive. Ee, mono' numuno nabau' nene O'moso'mi mo'mosi'veuko dizikelizave li evene' aka'ine hizi tili-ngidi lavolavo izi hukikani' nene di veseme' ili eveneto' medeli mini O'moso init'e lehizi-daa' ave naba ingine a'mine O'moso'mi mo'mosi've ve langu' dizaa' nani' ne'mine ogo a'mine O'moso'mo lo huko-lidine' initekumu' gapepe' ogo gizebo minaa' noune' lute gate ne'mo nene vo O'moso'mi mo'mosi've gihile neida nene nalava ize neine' gelavo none. ²⁰Ido' a'mine O'moso'mi mo'mosi've gihile neida nene Izesu' nesi nene Melekisedeki' gono daa' ine' monovolo' ogo eveneto' medelo mino O'moso init'e lehize-daa' ive naba lolo' ogosa leli' gamazite hize ele' olosa leli' nene gomu' molo lemo vo neive.

**Melekisedeki' Aza Nene Eveneto' Medelo Mino O'moso Init'e
Lehize-daa' Ive Mino Abalahamu'nisi Ido' A'vopilemo' Zuhouti Nesi
nGivile' Ogo Dizo Minine' Nenako Izesu' Aza Nene Eze Monovolo'
E'meto Eveneto' Medelo Mino O'moso Init'e Lehize-daa' Ive Mino
Abalahamu' Zuhouti' Eveneto' Medeli Mini O'moso Init'e Lehizi-daa'
Ave Engi' Nene nGivile' Ogo Dizo Miningumu' Gamazi Lo-ngimine'**

7 ¹A'mine Melekisedeki' nene Salemi ebeku' guvelesi ve mino ido'
eveneto' medelo mino veleta O'moso atoli'mine minive nene init'e
lehize-daa' ive nesi lolo' ogo minine' ve. Ido' Abalahamu' aza guve'inesi
ve ma minani' nene ngebele osu' lo tine' molo navo Melekisedeki' aza
vavo akalo' di go'ine hizi Abalahamu'ni nene no'noho' ize-dine' ve.
²Ne'mino Abalahamu'ni no'noho' ize-davo aza init'e mata've teni teni
(10 10) ne'mine miningut'i Melekisedeki'ni hamo hamo' ma imine'.
Ido' ei' gulive Melekisedeki' ne'mi monovo nene monovo've lisihekovo'
ogo minine' guvelesi ve ve. Ido' ebe've gulive Salemi ne'mi monovo
nene hongu monovo ve losa neine' nenako aza nene hongu monovo'vesi
minaa' ine' guvelesi ve nene neive. ³Ido' Aloni' monovo'velo' imine' mili

eveneto' medeli mini O'moso inite' lehizi-daa' ave nene lamine' Zakobo' gipele Levi' a'vopilemo' minani' nene ngelebizi avo'ninge ido' ize'ninge me'ningeliti gulive'ine li soto' ikevosavo' nene a'mine gonolo' ngele'mizi milaa' ani'za Melekisedeki' aza nene ne'minosa minamine' ve. Aza nene eveneto' medelo mino O'moso inite' lehize-daa' ive minine'za mono' godolou' nene avolomote ido' izele mele neti gulive'ine nene gizavo ma gelamune. Ido' soto' ogo mine do ogo hiline' ne'mi monovo nesi gizavo gelamune' ne'mo Melekisedeki' nene minevo' minevo' ogovo' minine' gelavo O'moso'mi gipele ei' ne'mine mino eveneto' medelo mino O'moso inite' lehize-daa' ive mine do vovo' vovo' ogo minaa' ive minine' ve.

⁴Ido' Melekisedeki' aza nene evene' naba goloso minani' neine' nemu' mene gili'nalo: Avoteho naba minive Abalahamu' aza nene lovou' ngivile' ine' alevetidati' inite' teni teni (10 10) do anguti' Melekisedeki'ni nene hamo hamo' imine' ve. ⁵Isilaele' aleve ma hazza alevesi ido' Levi' a'vopilemo' linge ma eveneto' medeli mini O'moso inite' lehizi-daa' ave lili' ave nesi mukito' nene Abalahamu' a'vopilemo' mini hamo' zuho minani'za a'mine eveneto' medeli mini O'moso inite' lehizi-daa' ave ingine O'moso'mo lou' gamazi lido' nene e'meti engi' Isilaele' aleve linge ma inite' teni teni (10 10) di soto' iga' anguti' hamo hamo' nene daa' ani' ve. Ee, inite' ngimaa' ave ido' inite' daa' ave muki' nene mo Abalahamu' a'vopilemokovo' minani'za mo engitistikisi ha daa' ani' ve. ⁶Ne neiha Melekisedeki' aza Levi' a'vopilemokuti' soto' amine' minine'za Abalahamu'nidati' inite' nene ha dani' ve. Ido' O'moso'mo salani gamazi lamine' Abalahamu'ni lo huko-daa' idi'mo nene evene' naba minine'za Melekisedeki' ne'mo nene no'noho' ize-dine' ve. ⁷Ido' O'moso'mo salani gamazi lamine' nene Abalahamu'ni lo huko-daa' idi'mo nene Abalahamu' aza evene' naba goloso minine' nene gele none. Ne neiha Abalahamu' aza Melekisedeki'ni ivile' ogo naba minidiniko Melekisedeki' aza Abalahamu'ni nene no'noho' ize-delido' o minamidine. No'noho' ize-delido' o minamidine'za aza mo Abalahamu'ni no'noho' ize-dine' nenako Melekisedeki' aza nene Abalahamu'ni ivile' ogo minine' ve. Ee, ve mali'mo ve ma no'noho' ize-deline' nene no'noho' ize-dive nene dizo minavo no'noho' dave nene lemo mineleseive lo gele none' nene lamine' nenako malite soza gamazi ve li mo lamilisave. Nemu' nene Melekisedeki' aza Abalahamu'ni ivile' ogo minive minaani' neive lo gelelesune. ⁸Ido' ma nene Levi' a'vopilemo' zuhouti' eveneto' medeli mini O'moso inite' lehizi-daa' ave nete evene'ineti inite' teni teni (10 10) mininguti' hamo hamo' daa' ave engi' nene hili vaa' ani' zuho nizave lo gele minelesune. Ne neiha a'mine'mine ogo evenetati' inite' daa' ive Melekisedeki' ei' nene hiline' ve li mono' godolou' gizamavo ne'mo Melekisedeki' nene helamo velesi hazavo' neine' giline' nemu' nene gelelone. ⁹⁻¹⁰Naza giluvoni' mo ne'mine luvodine: Abalahamu' lovouti' inite' teni teni (10 10) do

anguti' hamo hamo' Melekisedeki'ni imine' gameneu' nene Abalahamu' a'vopilemo' inite' teni teni (10 10) evenelite di minanguti' hamo hamo' daa' aveti avo'nibo Levi' nene olihe Abalahamudati' soto' amivo nenako azasi Abalahamukisi maka' mini a'mine inite' nene imasine' gelave. Nemu' nene eveneto' medeli mini O'moso inite' lehizi-daa' ave Levi' a'vopilemo' zuho nene Melekisedeki' eveneto' medelo mino O'moso inite' lehize-daa' gono daa' ine' ne'mo ngivile' ogo minine' ve.

¹¹ Ido' O'moso'mo Mose'ni lou' gamazi've imingu' nene gamazi ma ti' lo lo-imine' ma lingine mo gili nizani' ma neive: Levi' a'vopilemokuti' O'moso neni' nimani' inite' eveneto' medeli mini lehizi-nidilizave lili' igi minilizave ingine nene a'mine lou' gamazilo' nene gizebo igi evene' ngele'mize akalo' ilizave. Ne'mine lo lo-imine' nenako nemu' nene a'mine eveneto' medeli mini O'moso inite' lehizi-daa' ave nete evene' nene mudise ngele'mize akalo' ilizado' lisihel' gehepeve i minadiniko Levi' a'vopilemo' eveneto' medelo mino O'moso inite' lehize-daa' ive aza Aloni' gono daa' ine' ne'mino damo Melekisedeki' eveneto' medelo mino O'moso inite' lehize-daa' gono daa' ine' ne'mino daa' ive atoli'mine ogo minive Izesu'ni nene ma nanimu' do ote-didine. Levi' a'vopilemo' zuho ingine gono nene di pili di osu' ladiniko a'mine inite' lehize-daa' gono dalive gosoho' do ote-dive ne'mi gono've nene ma minamivo ma do ote-damidine. ¹² Ido' eveneto' medeli mini O'moso inite' lehizi-daa' gono daa' ave gomu' minado' nene medelo atoli'mine gosoho' soto' ogavo ma nene lou' gamazi nesi gosohokovo' soto' oloseinako nemu' nene gomu' lou' gamazi ne'mi gono've nene mo osu' lani' ve. ¹³ Ido' eveneto' medelo mino O'moso inite' lehize-daa' ive do ote-dingumu' atoli'mine ve ve luvoni' nene O'moso neni' nimani' inite' nene Melekisedeki' gono daa' ine' monovolo' e'meto lehize-nedaa' anive minevo' minevo' ogo minelesane lo O'moso'mo lo-dive nene Levi' a'vopilemo' zuhouti' soto' amo O'moso'mi holomolo' mili-dani' inite' lehize-daa' gono nene ma damaa' ave ato' zuhouti' soto' ogo minine' nenako nemu' nene luvoni' ve. ¹⁴ Ido' ato' zuhouti' soto' ive luvoni' nene Guvetesi ve aza Zuda' a'vopilemo' zuhouti' soto' ine' nene mukito' mo gele osu' lo none' nenako nemu' nene luvoni' ve. Ido' Mose' ne'mo lou' gamazi gizingu' nene Levi' a'vopilemo' zuhoutikovo' nene eveneto' medeli mini O'moso inite' lehizi-daa' ave lili' ilizave lo lo-ngidine'za Zuda' a'vopilemo' zuhoutikisi nene eveneto' medeli mini O'moso inite' lehizi-daa' ave lili' ilizave lo ma lo-ngedamine' ma neive.

¹⁵⁻¹⁶ Ido' eveneto' medelo mino O'moso inite' lehize-daa' ive atoli'mine soto' ine' nene lou' gamazi ma eveneto' medeli mini O'moso inite' lehizi-dilizave nene Levi' a'vopilemo' zuhoutikovo' mini oko'ine laminekisivo' minilizavetevo' nene O'moso inite' lehizi-daa' ave lili' ilizave li lou' milado' nene lisihel' o nouve losa Levi' zuholiti gonolo' medelo soto'

ine' nevoba asi minevo' minevo' ogo mino vo osu' lamaa' amuzo ezela miningumu' ve losa eveneto' medelo mino O'moso inite' lehize-daa' ive Melekisedeki' gonolo' medelo soto' ine' nenako gomu' minine' lou' gamazi nene O'moso'mo do ato' ingumu' luvoni' gamazi nene ne'mo soto' ogavo mo lamineto' ningekune. ¹⁷Ido' O'moso aza a'mine vemu' eveneto' medelo mino O'moso inite' lehize-nedaa' anive lolo' ogo minevo' minevo' ogo minelesane lo lo-dine' gamazi ne'mo a'mine luvoni' gamazilo' nene vo daanako mo lamineto' lokuve. ¹⁸⁻¹⁹Ido' O'moso'mo lou' gamazi gomu' minine' do ato' ine' ne'mi monovo nene ne'mino neive: A'mine lou' gamazi nene evene' hamokisi mudise lele'mize akalo' amivo evene' lisihe' lamine' mines'a'mune' ne'mo amuzo've nomine' mino evene' hize ele' o-ledamivo O'moso'mo lavo a'mine lou' gamazi nene gohi minamine'. Ido' ne'mine ogo O'moso'mo a'mine eveneto' medelo mino O'moso inite' lehize-daa' ive atoli'mine nene do soto' o-ledavo aza nene gomu' lou' nesi eveneto' medeli mini O'moso inite' lehizi-daa' ave nesi nene ngivile' ogo lele'mize akalo' ogavo ne'mo lisihe' lamine' ogo O'mososi maka' minelonido' lisihe' ogavo ezela nene lehete ogo minaa' noun.

²⁰Ido' eveneto' medelo mino O'moso inite' lehize-daa' ive gosoho' atoli'mine nene O'moso'mo ele'mize nomolo a'mine gono do minevo' minevo' ogo minelesane lo ei' gulivel' lo huko-damo haza do ote-dine' nevoba aza ei' gulive'velo' lo huko-do do ote-dine' ve. Inging Levi' a'vopilemo' zuhouti' eveneto' medeli mini O'moso inite' lehizi-daa' ave lili' ani' nene O'moso'mo ngele'mize nomolo lingine a'mine gono di minivi' minivi' ilisave lo ei' gulivel' lo huko-ngedadamivo haza di oti-ngidaa' ani'za ²¹a'mine ve gosohokumu' nene mono' godolou' ti' lo minine' gamazi nene O'moso ei' gulivel' lo lo huko-dine' ve:

Gaza nene eveneto' medelo mino O'moso neni' inite' lehize-nedaa'
anive lolo' ogo
minevo' minevo' ogo minelesane lo Guvelesi ve O'moso aza ei'
gulivel' lo huko-dine' ne'mo
lulo ngelo do velepe' izo soza lamoloseive.

²²Ido' Izesu' aza minevo' minevo' ogo gono dalive lo O'moso'mo ne'mine ogo ei' gulivel' lo huko do ote-dine' ne'mo leli' gele dalone' gamazi ve lo O'moso'mo minevo' minevo' gamazi lo huko-lidine' nene gihile izelingumu' hize ele' ilive izeleho nene Izesu' minavo ido' ne'mo nene a'mine idise lo huko-lidine' gamazi ne'mo gomu' aleve lo huko-ngidine' gamazi nene ivile' ogosa gamazi lamine' neive. ²³Ido' gomu' nene eveneto' medeli mini O'moso inite' lehizi-daa' ave minani' nene hilika' hilika' i'mi vaa' ani' ne'mo minivi' minivi' igi gono dalizado' minamavo evene' ato ato' muki' vai' nete nene eveneto' medeli mini O'moso inite' lehizi-daa' ave lili' ika' ika' i'mi vaa' ani' ve. ²⁴Ne'mine ani'za Izesu' aza helamo minevo' minevo' ogovo' mineline' nenako ezelo' medeli ma

minamavo eveneto' medelo mino O'moso inite' lehize-daa' gono nene mo mudise dovo dovo' ogo mineleseive. ²⁵Nemu' nene Izesu' aza lelikumu' nene isete izelive lo O'mosola lo minevo' minevo' ogo minaa' neine' nenako Izesu'nimu' gele ele'vole' ogo O'mosola vo hulunive leli' nene Izesu' do lu' izo mudise lele'mize lamine' ilido' neive.

²⁶Ido' aza ne'mine ve'mo eveneto' medelo mino O'moso inite' lehize-daa' ivete naba mino goloso ogo minunidot'i lele'mize lamine' ilido' lisihe' o neine' nenako ha do lu' izo lele'mize lamine' oloseive. A'mine ve nene aza ve lamine' atoli'mine ogo mino lulo do gopo o-deline' inite' hamokisi eita ma nomine' mino lihime daa' nani' leve ne'mino minamo atoli'mine gehepeve ogo mino okulumo' nesi ivile' ogo osu' lo dizosa neive. ²⁷Eveneto' medeli mini O'moso inite' lehizi-daa' ave naba ingine gamene gamene eveneliti lihime'ine apase-ngedelive li sipisipi nevo'mine inite' ngibili oloku' gizi O'moso lehizi-dilisa gomu' nene engi' lihime'ine apase-ngedelive li sipisipi ma ngibili O'moso imaa' nave. Izesu' aza dizosa mino engi' ngivile' ogo lihime'vesi nomine' lamine' minaa' neine' nenako ingine iga' adi'mine osa'mine' ve. Ei' nene gele ngemavo evenelite bili hilangu' asi've lulo oko'no've nene O'moso emavo leli' muki' lihimete nene mudise apase-ledelido' lisihe' ogavo ei' oko'no've nene gamene hamokovo' emavo osu' line' ma neive. ²⁸Ido' lelito' medelo mino O'moso inite' lehize-daa' ivete naba ne'mo gomu' eveneto' medeli mini O'moso inite' lehizi-daa' ave naba minani' nene ngivile' ogo lamine' minive ve luvoni' nene ne'mino neingumu' luvoni' ve: Gomu' minine' lou' gamazilo' e'meti eveneto' medeli mini O'moso inite' lehizi-daa' ave naba minilizave di oti-ngidaa' ani' nene ha evene' muki' amuzote nomivo minaa' noune' ngemeni damenisi minave nene di oti-ngidaa' ani' ve. Ee, ne'mine vevo' di oti-ngidaa' ani'za O'moso'mo gomu' lou' gamazilo' medelo alinge' eveneto' medelo mino O'moso inite' lehize-daa' ive mineline lo ei' gulive'velo' lo huko-dive ei' gipele nene do ote-dine' ve. Ido' a'mine gipele neve gopo haza neivosa do ote-dine' nevoba asi a'mine gono dalido' nene mudise do lisihe' o-davo neivosa nene do ote-dine' ve.

**Lelito' Medelo Mino O'moso Inite' Lehize-daa' Ivete Naba Izesu' Aza
Nene O'moso'mo Lo huko-lidine' Gamazi Gosoho' Nene Do Soto'
O-ledave. Ido' A'mine Gamazi Ne'mo Gomu' Lo huko Line' Gamazi
Nene Ivile' Ogosa Gamazi Lamine' Neingumu' Line' Gamazi**

8 ¹Gamazi noluvoni' ne'mi monovo ne'mino neingumu' nene
gelelesune: Eveneto' medelo mino O'moso inite' lehize-daa' ivete
naba ei' monovo've nene ne'mino neive lo lo-lingimuvoni' ma'mine
monovo laminekisi minive nene lelikumu' soto' ogo neive. Aza nene
O'mosolot'i lemo minive nenako Okulumokuko Guvelesi ve naba minive
O'moso'mo gizebo ogo minaa' neine' mo'mosi'veuko nene ana hulaa' ida

neive. ²Ido' a'mida nene evenelite gizamani' numuno Guvelesi ve'mo do soto' molani' mono' numuno ne'mi avazahalo' seli numuno gele vine' mono' numuno avotemote gizi di monani' ne'mine mono' numuno lulou' gehepeve O'moso'mi mo'mosi've neingu' nene mino inite' O'moso lehize-daa' gono've nene do neive. ³Ido' ne'mine gono do minaa' neine' nene eveneto' medeli mini O'moso inite' lehizi-daa' ave naba muki' di oti-ngidaa' nani' nene evene' O'moso imilisa di iga' nani' initekisi ido' lihimemu' sipisipi nevo'mine inite' ngibili oluku' gizi imilizave li di iga' nani' initekisi nene O'moso lehizi-dilizave li evene' di oti-ngidaa' nani' nenako nemu' nene azasi ne'mine gono do minaa' neive. Ido' ne'mine gono do neine' nenako nemu' nene azasi nene inite' O'moso ma lehize-delido' o minine' nenako mo nene lehize-dani' ve. ⁴Ido' aza nene misubouko mene minidini Mose' gizine' lou' gamazilo' e'meti eveneto' medeli mini O'moso inite' lehizi-daa' ave nene mo minani' nenako aza nene eveneto' medelo mino O'moso inite' lehize-daa' ive lolo' ilido' lisihe' amivo lolo' amidine. ⁵Inginge misubouko eveneto' medeli mini O'moso inite' lehizi-daa' aveti mono' numuno'ine ido' gono daa' nani' nene Okulumokuko minani' initeliti avazaha ido' mumuno'inevo' nene minaa' nave. A'mine nene mono' numuno seli numuno gele vine' nene Mose' gizelesa neivo O'moso'mo Mose'ni ti' lo lo-imine' ma'mino nene neive: Gaza nene gololo' minusido' seli numuno gele vine' mono' numuno ido' a'mingu' miniliza inite' muki' neti avazaha gelebizuvoni' malo' nene e'meto ehe' ogo minosa do lamino lolo' ogo gizezo. ⁶Ido' eveneto' medeli mini O'moso inite' lehizi-daa' ave ingine gomu' gono daa' ani' nene Okulumokuko gono gihile minine' ne'mi avazahalo' nene daa' ani'za Izesu' nene a'mine gono gihile nene nodavo ne'mo gomu' daa' ani' gono nene ngivile' ogo hozila neive. Ido' gomu' aleve lo huko-ngidine' gamazi neu' nene O'moso'mo inite' lamine' o-ledelesa lo huko-lidine'za leli' lo huko-lidine' gamazi gosohoku' nene ivile' ogosa inite' lamine' goloso o-ledelesa lo huko-lidine' nenako Izesu' aza lelikisi O'mososi kuku hololedo gamazi hulo eza ema ogo leli' gele dalone' gamazi ve lo O'moso'mo lo huko-lidine' gamazi lo do ogo limine' ne'mo O'moso'mo gomu' aleve lo huko-ngidine' gamazi nene ivile' ogo neine' nene gele none. Ido' a'mine votigilelo' a'mine'mine ogo Izesu' gono do neine' ne'mo misubouko eveneto' medeli mini O'moso inite' lehizi-daa' avete gono di minaa' ani' nene ivile' ogosa lamine' neive.

⁷Avotemote gili dalizani' gamazi ve lo lo huko-ngidine' gamazi ne'mo gono davo vo gihile ma izidiniko a'midot'i nene leli' gili dalizani' gamazi ve lo gosoho' ma do soto' ogo lo huko-ledamidine. ⁸Ne'mine amidine'za avotemote igi mili iga' ani' monovo'ine goloso nene do soto' o-ngedosa Guvelesi ve'mo line' gamazi ma mono' godolou' ti' li gizi nizani' ma neive:

Guvelesi ve'mo ti' lo lave:

Gililo. Isilaele' zuhoti muliseukisi Zuda' zuhoti muliseukisi nene
gili dalizani' gamazi gosoho' ma lo huko-ngedo do soto' oloni'
gamene nene
alinge' ma soto' oloseive.

⁹ A'mine gili dalizani' gamazi gosoho' ma lo huko-ngedeloni' nene
avo'ningine Aigita misubouti' ngele'mizo novosa gili dalizave lo
lo huko-ngiduvoni' gamazilo' nene e'metamadi'mo ingine nene
ninge mate-ngedo minuvoni' nenako ne'mo nene gomu'
lo huko-ngiduvoni' gamazi ma'minosa lo huko-ngedamo
atoli'mine ogo lo huko-ngedelesuve lo

¹⁰ Guvelesi ve'mo gohi ti' lo line':

Alinge' a'mine noluvoni' gamene nene ogavo neloti'
alinge' nene Isilaele' a'vopilemo' zuho mukilite gili dalizani' gamazi
ato' gohi ma lo huko do soto' o-ngedelesuve.
A'mine lo huko-ngedeloni' gamazi nene ne'mino neive:
Neni' lo huko loloni' gamazi muki' nene engi' ga'ningu' molo-ngedo
lu'ningu' nene luhuvo gizekelesuve. Ne'mine ogo engi' O'moso'ine
lolo' ogo nouvo ingine nene
neni' evene'ne zuho lili' igi minilisave.

¹¹ Ne'mine igi evene' dizi minani' limi minani' muki' nene
nenikumu' gili osu' li gili nilizani' nenako ve malite ingine zuho
ga'ine di

Guvelesi vemu' gili minilo li ma li-ngidamilisave.

¹² Ido' ne'mino lo huko-ngedeloni' nene goloso inite' dangumu' nene
ise'ine ize-ngedosa a'mine lihim'e'inemu' nene
gohi ga'ne gelamolosuvonako nemu' Isilaele' aleve nene
a'mine luvoni' gamazi nene lo huko-ngedelesuve lo Guvelesi ve'mo
line'.

¹³ Ido' gili dalizani' gamazi nene gosoho' lo huko-ngedelesuve line'
nenako ne'mo gomu' lo huko-ngidine' gamazi nene mo litehe iline' ne'mo
nene mo geto vo haleke gehepeve ilido' ogave.

Me Misubouko Mono' Numuno Ado' Seli Numuno Gele
Vine' Gizani' Nesi Ido' A'mingu' Gono Daa' Ani' Nesi
Nene Okulumoku' Avazahalo' Iga' Ani' Nemu' Line'

9 ¹Ido' a'mine gamazi gomu' lo huko-ngidine' nene O'moso gubi'
izi imi opo'ni laa' ido' inite' oluku' gizi imaa' nemu' nene lou'
gamazi'vesi minivo minine' ve. Ido' a'mine lo huko-ngidine' gamazi
nemu' nene misubouko mene mono' numuno ma minine' ve. ²Ee, seli
numuno gele vine' mono' numuno nene mo gizi di otani' ve. A'mine
mono' numungu' gana' lumu izi hukikangu' nene lamu livi' di badaa' ani'

zavasi ido' O'moso lehizi-di velelo' mili-dani' beleti nesi ido' tevoli'vesi nene minaa' ine' ve. A'mine izi hukikani' lumu nene kekeize lo minine' numuno lulo ve laa' ani' ve. ³Ido' oduvo numuno lulo gohi ma izi hukiki lavolavodunu' izi tilikani' nemu' nene mo kekeize atoli'mine lo minine' numuno lulo ve likevo minaa' ine' ve. ⁴A'mine numuno lulou' nene unuovo lamine' oga' ine' inite' O'moso gizi imaa' ani' holomo ngolidunu' lili' ani' nesi ido' evene' gili dalizave lo lo huko-ngidine' gamazi milikani' bokisi ngolidunu' asabu' izi lili' ani' nesi ido' a'mingu' go'zikani' inite' nene Okulumokuti' ngimine' noso' nite' gulive mana minine' somo ngolidunu' lili' ani' nesi ido' Aloni' hatuso sisive ho'line' hatuso've nesi ido' O'moso'mo lo huko-ngidine' gamazi luhuwo gizine' geheni nesi nene minaa' ani' ve. ⁵Ido' a'mine bokisi veleto' nene inite' sita' ma evene' godo'ine ne'mino mino holoke'ne'nesi minasine' inite' gulive kelubu avazahalo' lili' ani' inite' nene minaa' asine'. Kelubu ingine hela hela mini holoke'ne'ine di pateli di hozi li hiti nizasivo oluso' nene O'moso'mo evene' lihime'ine apase-ngedaa' ine' mo'mosi've nene minine'. Ido' minine' nenako a'mine kelubu minasido' nene O'moso'mi labanala nene soto' ogo minaa' ine' ve. Ido' a'mine inite' neti monovo nene ato ato' vai' neine' nenako a'minemu' imine' molo gohi ma lo-lengemelodo' nomive.

⁶Ido' a'mine inite' nene di va'va' igi osu' likevo eveneto' medeli mini O'moso inite' lehizi-daa' ave ingine mono' gono'ine nene nidi a'mine mono' numungu' gana' izi hukikani' numuno lulou' nene gamene gamene dizaa' naha ⁷a'midot'i numuno lulo gohi ma izi hukikangu' nene eveneto' medelo mino O'moso inite' lehize-daa' ive naba ne'movo' nene kilisimasilo' kilisimasilo' gamene hamokovo' dizaa' neive. Ido' dizeli gamene nene ei' lihime'vesi eveneliti lihime'nesi nene O'moso'mo apase-ledelingumu' ve lo ato ato' izeliti vanisesi nene damo dizo vaa' ine' nevoba ha do-dosavo' nene a'mingu' dizo vaa' ine' ve. ⁸Ne'mine oga' ine' nenako neloti' nene ti' lo gelelesune: Gana' izi hukani' numuno lulo nene vo goloso amo hazavo' neivo ma numuno lulo gohi ma O'moso'mi kekeize atoli'mine lo minine' numuno lulo ve li izi hukikavo akalo' tile minine' lavolavo nesi nene ha mineline' nenako O'moso neida volone' akate nene olihe do soto' o-ledamive lo O'moso'mi Sikalahu' ne'mo lelebizavo gelelesune. ⁹Ido' mono' numuno ado' seli numuno gele vine' nesi ido' a'mingu' igi mili di soto' ani' inite' nene idise gameneu' igi mili iga' nani' inite' neti avazaha'ine do soto' ogavo ne'mi monovo ti' lo noningune: A'mingu' nene inite' ma O'moso imi ido' sipisipi nevo'mine inite' ngibili lihimete apase-ledelive li oloku' gizi O'moso imi minaa' nani'za ne'mo ne'mine iga' aveti lu'ine nene ma do lisih'e' lamine' o-ngedesa'mive. ¹⁰Ido' lu'ine do lamine' o-ngedesa'mine' nene oko'inevo' do lamine' o-ngedeline' lou' gamazilokovo' nene e'meti minaa' ani' nenako ne'mo lu'ine nene do lisih'e' lamine' o-ngedesa'mive. Ee, a'mine lou' gamazi nene noso' nite'

ido' noso avoso nalizangumu' ido' ato ato' monovomu' nosou' ingi oko'ine noso izi hulilizangumu' ido' nevo'mine initekumukovo' nene gamazi li gizi Kilisito' monovo gosoho' do soto' ogo inite' muki' do lamine' ilidokovo' nene mino osu' loloseive li gizi nizani' ve.

¹¹Ido' Kilisito' nene eveneto' medelo mino O'moso inite' lehize-daa' ive naba mono' inite' lamine' id'i'ne O'mosolati' soto' o'mo novine' nene do soto' ive lolo' ogo mo ogave. Aza nene mono' numuno ado' seli numuno gele vine' nene ivile' ogo lamine' goloso mino ido' ei' gono dalido' lisihe' gehepeve o minine' mono' numuno nene evenelitesi lili' amani' asi mo mene misuboukosi ma minamine' mono' numunomu' noluve. Aza a'mingu' nene dizo gono do ¹²meme' ize ido' bulumaka' angale neti vanise nene a'mida do vamo ei' vanise've nene gamene hamokovo' mudise O'moso'mi mo'mosi've kekeize lo minida do vo minine' ve. Ido' ne'mine ine' ne'mo goloso ogo minunidot'i' nene mudise do lu' izo O'mosola tine' molo vo minelone' akate vele-lidine' ve. ¹³Ido' meme' ize ido' bulumaka' neti vanisemu' luvoni' nene monokumu' kekeize lani' inite' dikevosa monoku' dizilizani' akatine nene hize tile-lengedo okodida sihononi ne'mine inite' hiteline' nene gilite-lengedelive li meme' izeliti vanisesi ido' vemoho' bulumakaliti vanisesi ido' alungo bulumaka' gizi'votani' ne'mi lenehe've nesi nene O'moso imikevosa ne'mo okodida sihononi ne'mine hiteline' nene do hulavo lamine' oga' neine' nenako nemu' nene luvoni' ve. ¹⁴Ido' neve nene inite' ngomoli'mo okodida sihononi ne'mine hitine' nene do lamine' oga' neine' nenako inite' naba Kilisito' vanise've ne'mo monovotine goloso labuluvo oga' aka'u' lengele'mize molaa' neine' neti lihime lutine gatingu' nene gilite hulo-lengedo minevo' minevo' O'moso gelekele' i-di gubi' izi imi minilizado' nene do lisihe' o-lengedelido' nene mo lisihe' gehepeve o neive. Ee, O'moso'mi minevo' minevo' Sikalahu've ne'mo Kilisito'ni hize ele' o-davo aza oko'nolo' lihime hamokisi minamine' mino oko'no've hulo O'moso imine' nenako ne'mo nene leli' lute do lamine' o-ledelido' lisihe' o neive.

¹⁵Ido' Kilisito' vanise've ne'mo lihimete muki' gilite hulo-ledaa' neine' nenako Izesu' aza nene evenekisi O'mososi kuku holo-ledo gamazi hulo eza ema ogo leli' gele emelone' gamazi ve lo gosoho' gamazi O'moso'mo lo huko-lidine' nene do ogo limive lolo' ogo neive. Ido' ne'mine ine' nene O'moso'mo izipahala zuho minilizave lo elese molo-ledo lele'mize molave leli' nene minevo' minevo' inite' lemelove lo lo huko-ledo salani molo-lidine' inite' daloningumu' ve losa ne'mine ine' ve. Ee, O'moso'mo gomu' lo huko-lidine' gamazi nene avuto' ogo lihime duningumu' a'mido' golo hizo Izesu' hiline' ne'mo nene a'mine lihime nene apase-lidine' nenako ne'mo nene a'mine salani molo-lidine' inite' dalone' aka nene ngolo' lo neinako ha dalosune. ¹⁶⁻¹⁷Ee, Izesu' nene ma helamidiniko O'moso'mo salani molo-lidine' initekisi ido' leli' dalizave lo lo huko-lidine' gamazisi

nene gihile izelido' minamidine. Lingine mo gili nizave. Evene' malite alinge' hililizangumu' leli' monovolo' e'meti luhuvo ti' li gizi milaa' nave: Laza helekunivo ma mene alevete leli' initete nene dalizave li a'mine inite' dalizangumu' li huki-ngidani' gamazi nene luhuvou' gizi milaa' nave. Ido' a'mine inite'ine dalizangumu' luhuvo gizani' nene gizave hilikevo ne'movo' nene a'mine li huki-ngidani' gamazi nene gihile izelido' vo lisihe' iline' nenako nemu' nene luhuvo gizave hilami ve'nesi ha nizavo ma nene a'mine gamazi nene olihe gihile izamo ha minaa' neive. Nemu' nene ve mali'mo ne'mine luhuvo gize molosa mino helavo ma inite've dalizave ingine a'mine luhuvo gizive nene mo helanako luhuvo gizado' e'meto inite've ma nene ha dalosune lilisave. Lilisaha helave lilizani' gamazi nene mo lamineto' lahe ido' soza lahe nemu' nene gomu' ningi gilikevosavo' nene a'mine dalizave line' inite' nene ha dalisave. Helaa' ne'mo li hukaa' nani' gamazi nene do amuzo molaa' neive. Nemu' nene Izesu' aza helamidini O'moso'mo salani molo-lidine' initekisi' ido' leli' dalizave lo lo huko-lidine' gamazisi nene gihile izelido' minamidine. ¹⁸Ido' helaa' ne'mo li hukaa' nani' gamazi nene do amuzo molaa' neine' nenako nemu' a'mine'mine ogo O'moso'mo gomu' lo huko-ngidine' gamazi nene hazo do amuzo molani' nevoba helaa' ne'movo' nene do amuzo molani' ve. Do amuzo molani' nene bulumaka' ngibili hilikevo neti vanise'ine ne'mo a'mine gomu' lo huko-ngidine' gamazi nene do amuzo molani' ve. ¹⁹Ee, a'mine lou' gamazi mininguti' gamazi godolo godolola nene Mose' lo soto' ogo evene' lo-ngemavosa ingine nene bulumaka' ma ngibilikevo Mose' aza vanise'ine do nososi do gopo ogo unuovo oga' ine' za ngomo ma gulive hisopu ve lo minine' ne'mi a'nava ma do a'mido' nene sipisipi zopovo gulehedunu' nene likosa vaniseu' nene lupizoo a'mine lou' gamazi'mi luhuvolokisi ido' a'mida evene' mukitokisi nene hibi' izo nohulo-ngedo ²⁰gamazi ti' lo line': Vanise mene O'moso'mo lou' gamazi gili dalizave lo lo huko-lingidine' nene do amuzo molaa' neine' vanise ma neive. Ido' Mose' ne'mine ine' nenako nemu' O'moso'mo gomu' lo huko-ngidine' gamazi nene vanisedunu' di amuzo mili-dani' ve luvoni' nene mo lamineto' luvoni' ve. ²¹Ido' Mose' aza luhuvosi evenekisi vanise hibi' izo hulo-ngidine' ne'mino mono' numuno ado' seli numuno gele vine' nesi ido' O'moso opo'ni li gubi' izi imaa' angu' nene lapese gomise mite' inite' muki' a'mingu' milikevo minido' nesi vanise hibi' izo huline' ve. ²²Ido' gomu' lo huko line' lou' gamazi neu' nene naza luvoni' evenekisi ido' luvoni' initekisivo' nevoba inite' muki' gidini ne'mine ma goloso ilizahe lihime dalizahe ilizani' nene initeliti vanisedunu' nene do lamine' olosane lo lo hukine' ma neive. Ido' a'mine gomu' lo huko line' gamazi neu' nene ize nevo'mine gana' ma bili vanise'inedunu' nene hibi' izi O'moso'mi holomo'velo' hulamani' nene lihime nene mo keke' apase-ngedes'a'mine' ve.

**Kilisito' Nene Oko'no Hulo Vanise've Lepo O'moso Noemo
Hiline' Ne'mo Lihimete Apase-lidine' Nemu' Line'**

²³Ee, gomu' lou' gamazi ne'mo ne'mine ilizave lo lo neine' nenako nemu' a'mine seli mono' numuno nesi a'mingu' inite' muki' nesi nene Okulumoku' minine' avazahalo' lili' ani' inite' nene luvodi'mine igi bulumaka' ngibili O'moso imi vanisedunu' nene hibi' izi-ngidi di kekeize lilisave. Ne'mine ilisaaha misubouko mene avazaha inite' do lamine' o-ngedelive li bulumaka' ngibili vanise'ine hibi' izi hulaa' nani' nene Okulumoku' inite' do lamine' o-ngedelido' lisuhe' o mineline' inite' ne'mo ngivile' ogo lamine' goloso minelesive. ²⁴Ido' nene nanitekumu' luvoni' neve. Kilisito' aza mono' numungu' dizine' nene evenelite lili' igi di kekeize lani' mono' numuno ado' Okulumokuko minine' ne'mi avazahalo' minine' mono' numungu' nene dizine' nevoba asi mo Okulumoku' gehepeve nene dizo leli' hize ele' o-ledelesa O'moso'mi velelo' vo neive. ²⁵⁻²⁶Ido' dizine' nene Zuda veti eveneto' medelo mino O'moso inite' lehize-daa' ive naba aza ei' vanise've do dizamo ize ato atoliti vanise'ine nene O'moso'mi kekeize atoli'mine lo minine' numuno lulo'veu' nene kilisimasilo' kilisimasilo' do dizo O'moso lehize-deka' lehize-deka' oga' ine' ne'mine nene ei' Kilisito' ilido' o minidiniko O'moso'mo misubo do soto' idot'i api' ogo gamene muki' oko'no hulo'mo ogo mulumo geleka' geleka' ogovo' minidine'za a'mine Zuda veti eveneto' medelo mino O'moso inite' lehize-daa' ive naba'mo oga' ine' ne'mine ilido' minamine' nenako nemu' aza gamene muki' eze oko'no hulo vanise've lepo O'moso lehize-deka' lehize-deka' ogo minelesa dizine' nevoba asi O'moso'mo molani' gamene nene osu' lolosa neivo Kilisito' aza gamene hamokovo' ei' oko'no nene hulo vanise've lepo O'moso lehize-do lihimete nene mudise hulo-ledelesa soto' ine' ve. ²⁷Ido' O'moso'mo lido' ogo evene' laza gamene hamokovo' helosa O'moso'mo goni' o-ledelido' volosunako ²⁸Kilisito' aza a'mine'mine ogo evene' mukiliti lihime geho oko'no've hulo hiline' nenako alinge' gohi aline' nene lihimetemu' amo eikumu' gizebo nonive nene mudise do lu' izo lele'mize lamine' olosa aloseive.

10 ¹Ido' gomu' lou' gamazilo' e'meti ize ato ato' ngibili O'moso lehizi-dikevo ne'mi gihile've inite' lamine' soto' o ngemaa' neine' nene alinge' inite' lamine' lelita soto' o lemeline' nene inite' gihile ne'mine engita nene ma soto' o ngemesa'mine' ve. Asi mo alinge' soto' o-ledeline' inite' neti avazaha ne'minevo' nene soto' o ngemaa' neine' nenako ingine nene kilisimasilo' kilisimasilo' lihimete apase-ledavo lisuhe' lamine' mineloningu'mu' ve li ize ato ato' di igi ngibili O'moso lehizi-dika' lehizi-dika' igi minaa' nani' ne'mo ngelo do lisuhe' lamine' gehepeve o-ngedesa'mine' nenako nemu' nene a'mine inite' nene O'moso lehizi-dika' lehizi-dika' igivo' minaa' nave. ²Ee, ne'mine iga' nani' ne'mo

lihime'ine apase-ngedo mudise do lisihe' gehepeve o-ngididiniko a'mine inite' O'moso imi gubi' izi imaa' nave ingine nene lihimete nomine' minelesune li ize ngibili O'moso lehizi-dika' lehizi-dika' nani' nene huli alamadine. ³⁻⁴Ne neiha vemoho' bulumaka' neti vanisesi meme' ize neti vanisesi ne'mo nene eveneliti lihime'ine nene apase osu' lo-ngedamilido' nenako kilisimasilo' kilisimasilo' ingine ne'mine inite' ngibili vanise'ine nene O'moso lehizi-daa' nani' ne'mo lihime dani' mamu' nene gohi gili oko'nido' gilaa' nave.

⁵Nemu' nene Kilisito' misubouko mene lemelesa noogo mono' godolou' melehine lo imine' gamazi ma ti' li gizi nizani' ma neive:

Gaza evene' isaa' neve li ize ato ato' bili gimi ido'
inite' gohi ato ato' nene gimika' gimika' igi minilizave lo gelamo
neni' nene gelekele' o-gedelongumu' ve lo
oko'ne nene do va'va' ogo molo-nedane.

⁶Ee, ize ma bili oloku' gizi' voti gimi ido'
lihime apase-ngedelive li ize ngibili
vanise'ine gima'a' nani' nemu' nene lanite' gelesa'manivosamu'
⁷ti' lo lo-gimuvoni' ve: O'mosoo, gelezo.

Naza mono' godolou' nenikumu' lou' gamazi gizi nizani' malo'
nene e'meto gei' lukalo' do molo gelekele' o-gedelesa uvoni' ve.
⁸Ido' Mose' lou' gamazi'mo lido' e'meti iga' nani' initekumu' Kilisito' aza
O'mosomu' line' nene ize ato ato' bili gimi ido' ato ato' inite' nesi issa'
neve li gimi ido' lihime apase-ngedelive li ize bili gizi' voti gima'a' nani'
nene lanite' gelamosa nimika' nimika' igi minilizave lo gelesa'mane
loosa ⁹neloti' nene gei' lukalo' do molo gelekele' o-gedelesa uvoni' ve lo
Izesu' lidi'mo lihimetemu' ize belo O'moso emaa' monovomu' nene gana'
line' gamazi nene do hulo O'moso'mi lulolo' do molo gelekele' o-daa'
monovomu' alinge' line' gamazi nene do otine' ve. ¹⁰Ido' Kilisito' aza
O'moso'mi lulolo' e'meto leli' mukikumu' nene gamene hamokovo' oko'no
hulo helo O'moso imine' ne'mo lute do lisihe' o-ledo O'moso gelekele'
o-do minelone' evenele lolо' o-ledave.

¹¹Ido' eveneto' medeli mini O'moso inite' lehizi-daa' ave muki' ingine
nene go' laneme go' laneme mono' gono'ine nene di mini ize ato ato'
ngibili gamene gamene hamo' initekovo' igi O'moso imi'mi vi minaa'
nani'za eveneliti lihimete nene apase-ledelido' lisihe' amine' initekovo'
imaa' nave. ¹²Inginge ne'mine iga' nani'za Kilisito' aza gamene hamokovo'
oko'no hulo helo O'moso imine' ne'mo eveneliti lihimete nene mudise
apase-ledelido' vo daavosa O'mosolati' lemo minive ei' mo'mosi've
O'moso'mo ana hulaa' ida neido' a'mida vo neive. ¹³⁻¹⁴Ee, eze oko'no
hulo helo mo gamene hamokovo' O'moso imine' ne'mo O'moso gelekele'
o-do minelone' evenele nene mo mudise do lisihe' lamine' gehepeve
o-lidine' nenako nemu' nene oko'no've gohi hulo helo O'moso

emamo vo O'moso'mo ana hulaa' ida ei' mo'mosi'velo' mino neloti' nene ei' Kilisito'ni biluva' i-daa' ave nene gelekele' i-dilizave lo O'moso'mo gizeneuko do'mo leme-ngedelingumu' nene gizebo o neive.

¹⁵ Ido' a'mine luvoni' gamazi nene O'moso'mi Sikalahu' ne'mosi hize ele' ogave. A'mine Sikalahuli'mo ei' gamazi've lo-limine' mono' godolou' ti' li gizi nizani' ma neive:

¹⁶ Guvelesi ve'mo ti' lo line':

Gamene muluvoni' nene ogavo alinge' evene' mukilite gili dalizani' gamazi gosoho' gohi ma lo huko do soto' o-ngedeloni' gamazi nene ne'mino neive: Naza lo huko do soto' o-ngedeloni' gamazi nene lu'ningu' molo-ngedo ido' ga'ningu' nene luhuovo ne'mine gize-ngedekuvo mineleseive.

¹⁷ Ido' ne'mine lo neloti' alinge' gamazi gohi ma ti' lo line':

Ido' evene' engita lihime minine' mamu' nesi ido'
lou' gamazi avuto' iga' nani' mamukisi nene
gohi ga'ne gelamolosuve.

¹⁸ Ido' O'moso'mo lihimete muki' nene apaso osu' lo-ledavo ma nene lihimete apase-ledelive lo lihimetemu' ize ato atoli'mine belo oloku' gize emaa' une' ma nene gohi ma amolosune.

Laza O'moso'mo Lihime Lemelihe Lebelelihe Lo Golise Gelamo Ezela Vo Gi'mizelone Lo Lo-ngimine'

¹⁹ Nemu' nene neze zuho lingine Izesu' vanise lepo helo O'moso imine' ne'mo lihimete nene mudise apase-lidine' nenako nemu' nene golise gelamo O'moso'mi kekeize atoli'mine lo minine' numuno lulou' nene ha vo dizelonido' o neive. ²⁰ Ee, Izesu' eze oko'no hulo hiline' ne'mo O'moso'mi kekeize atoli'mine lo minine' numuno lulou' nene evene' dizikelizave li mono' numuno nabau' lavolavodunu' akate hizi tili-limikani' nene mudise bele ngolo' lo-ledo O'mososi bizo minelone' aka gosoho' ele'vole' ogo minevo' minevo' iline' nene vele-ledave. ²¹ Ido' lelito' medelo mino O'moso inite' lehize-daa' ivete nene aza evene' naba mino O'moso'mi evenele zuho leli' nene gizebo o-lede neive. ²² Nemu' nene eveneto' medeli mini O'moso inite' lehizi-daa' ave ngele'mize milalizangumu' a'mine ve nene di lamine' i-ngidi oko'nido' nene vanisedunu' hibi' izi huli-ngidi ido' noso' izi-ngidaa' ani' ne'mino aza leli' lute nene ei' vanise'vedunu' hibi' izo hulo-ledo a'mingu' monovo goloso minine' nene do hulo-ledo ido' okode nene noso laminedunu' noso ize-lidine' gelavo mino lute lisihe' lamine' minidi'mo O'moso golo izamo ido' gate seta' gelamo ezemu' gele ele'vole' goloso ogo O'mosola ogo ezesi bizo minuke'zo. ²³ Ido' O'moso'mo inite' muki' ha olosuve line' inite' nene mo lamineto' oloseive lo mo gele none' ma nenako laza gele ele'vole' ogo O'moso'mo lemelove lo lo neine' initekumu' gizebo

ogo minaa' noningumu' lo soto' oga' noune' nemu' nene golise gelo hulamo do gili' lo do minelone. ²⁴Ne'mine ogo lute ngemo nasahili' o-ngedaa' monovo ido' nevo'mine gono lamine' ato ato' daa' monovo lamine' nene lelita amuzo molo minelive lo ge luka do ote-gede ne lu'ne do ote-nede lolone' akamu' nene vise' ogo ningoo molo minelone. ²⁵Ido' evene' malite monokumu' do gese' oga' monovo hulaa' nani' ne'mine igi lingine hulami monokumu' di gese' i'mi vi mini monoku' ge hize ele' o-nede ne hize ele' o-gede li minilo. Gamene naba mo avito' navo lingine mo ningi gili nizani' nenaze. Nemu' nene lingine mo ge hize ele' o-nede ne hize ele' o-gede livi' livi' igivo' minilo.

²⁶Ido' laza Kilisito' gamazi've gihile laminekumu' nene mo gelo e'meto minaa' noolonivete lihime daa' initekumu' nene mo amolone' inite' neive lamo lihime doso' ne'mo Kilisito' vanise've lepo helo lihimete apase-ledeline' aka vele-lidingumu' nene o've lune' geleleseive. Ido' laza lihime daa' akalo' gohi volone' ne'mo O'moso'mo lihimete apase-ledeline' aka nene Kilisito' vele-lidingumu' nene o've lune' gelavo a'mine lihimetemu' golo hizo O'moso lehize-delone' inite' gohi ma minamoloseinako a'mine lihimete nene O'moso'mo ha do minelesive. ²⁷Ido' a'mine lihime'ine do minelive nene O'moso biluva' i-daa' nanako aza olo' goloso lo neine' oluku' ngimiselavo a'mingu' vi tolovo ilizani' nenako laza golise volone' akate ato' ma nominako nemu' laza lihime daa' akalo' gohi ma volone' nene lehelele izivo golise goloso gelo O'moso'mo lihime lemo oluku' huloledo ne'mine o-ledeline' gamenemukovo' nene gizebo ogo minelesune. ²⁸Ido' Mose' lou' gamazi avuto' ave nene mo ise'ine izisa'mani' ve. Ve malite a'mine lou' gamazi avuto' ani' nene evene' sitape sitohamolite he ningi goniku' li soto' i-ngidikevo a'mine lou' gamazi avuto' ave nene lihime ngimi ngibili hilaa' nave. ²⁹Ee, Mose' lou' gamazi've nene mo gili e'meti minaa' niigisa a'mine lou' nene ma avuto' ani' nene ngibili hilaa' ani' nenako Mose'ni ivile' ogo minive O'moso'mi gipele aza O'moso'mo lo huko-lidine' gamazi gosoho' nene do amuzo molo ido' engi' lu'ine do lamine' o-ngedo O'moso'mi evenele lolol' o-ngedo vanise've lepo hilingumu' gilikevo haza inite' ogavo eze nene lisi hupi' izi-dii ido' leli' nasahili' o-ledaa' ive O'moso'mi Sikalahu' nene di u'musupo lizi-dilizave nene Mose' lou' gamazi avuto' ikevo lihime'inemu' ngibili hilaa' nani' nene ivile' ivosa lihime nabalo' goloso ngemeleseive. ³⁰Mono' godolou' gizani' gamazi ma ti' lo livemu' mo gele none:

Lihime ngemaal' gono nene neni' gono nenako lihime nene neni' ngemelesuve.

Ido' ma nene:

Guvelesi ve'mo zasi gono do eze evenele ize' molo-ngedeleseive. Ido' a'mine gamazi live nene O'moso'mo line' nenako nemu' nene Izesu' monovo danavamu' mo gili minisasi avuto' iga' nave nene lihime ngemo

mo ngebeleleseive losa mo gele none. ³¹Nemu' nene laza ne'mino lihime do minelonidotil' lebelaa' amuzo'vesi minive minevo' minevo' O'moso'mi anau' alone' nene lihime atoli'mine ogo lemeleseinako agae mo nehelele goloso izo live. Nemu' nene lihime akau' vaalone lo ge hize ele' o-nede ne hize ele' o-gede lovo' lovo' ogovo' minelone.

³²Gomu' gameneu' lingine minani' monovomu' gatine molalize. A'minemu' gohi gili minilo. A'mine gameneu' nene Izesu'nimu' gilikevo ne'mo lutingu' hize labana' elavo minani' ne'mo goboni mala' mala' i-lingidi nizavo mulumo alumo gili'mi vi minisasi Izesu' mono've nene hulami amuzo mili di minani!. ³³Ee, gamene ma nene evene' mukiliti ve'nido' di oti-lingidi gamazi goloso li-lingidi di goloso i-lingidaa' ani' ve. Ido' gamene ma nene lingine zuhola a'mine suno nene soto' noo-ngidivo linginesi a'mingu' vi makato' a'mine geni nene gihaa' ani' ve. ³⁴Ne'mine noluvoni' nene Izesu'nii biluva' i-daa' avelite henenitine inite' matatine ipe' igi di vikevo lingine nene laza a'mine heneni nene ivile' ogo minine' lute'mi minevo' minevo' iline' heneni nene ha molo none li gili longolize izi ningi mati-ngimikavo dii vaa' ani' ve. Ido' lingine zuho Izesu' evenele linge nala' numungu' minani' nene mulumo'ine gili nasahili' i-ngidaa' ani' nemu' nene noluve. ³⁵⁻³⁶Ee, lingine gomu' nene lengita geni inite' ato ato' muki' soto' ivo a'mingu' amuzo mili gili ele'vole' igi minani' nenako ne'mi gihile've dalizangisi idise lengehelele izavo a'mine gili ele'vole' ani' nene hulikelizaze. Ha gili ele'vole' igi di minilo. O'moso'mo lemeloce lo salani molo-lidine' inite' nene dalone li ma a'mine geni inite' soto' o-lengemelingutu' nene olovo' igi limi ingami amuzo mili gili ele'vole' igivo' minilizani' nenako nemu' nene a'mine gili ele'vole' ilizani' monovotine nene hulami di gili' li di minilo. Amuzo mili gili ele'vole' igi minilizani' nene O'moso'mo menitine naba lengemeleseive.

³⁷Ido' geni lengebelelingu' nene olovo' ami ha amuzovo' mili gili ele'vole' igi minilizani' nene mono' godolou' Izesu' geto alingumu' ti' li gizi nizani' nenako nemu' ne'mine ilizave:

A'mine aloseive lave nene gamene ha'na ne'mine minosa alivoba
aline' gamene've nene mo li'nibe o neive.

³⁸Ido' O'moso'mo ti' lo line':

Ne'mine o neiha neze evene'ne zuho lu'ine lisihekisi minani' nete
nenikumu' gili ele'vole' igivo' minilizani' ne'mo
hazavo' ele'vole' igi ve'inesi mini-di vii minilisani'za
gili ele'vole' igi mini-di vilizanguti'
ve ma ingine olovo' igi velepe' izi vilizani' nene
naza mo lu'neu' goloso gehepeve gelelesuve.

³⁹Ne'mine lo line'za laza nene evene' ma ingine gili ele'vole' igi mini
di vangutu' olovo' igi velepe' izi vii vi tolovo iga' nave ne'mine evene'
minamo laza nene gele ele'vole' ogo mino mine do dizo minaa' lemeni
dameni do minelonive nene none.

Gele Ele'vole' Ogali'mi Monovo Lo-ngimine'

11 ¹Gele ele'vole' oga' monovo nene ne'mino neive: Laza O'mosomu'
gele ele'vole' o noo ma aza lemelove lo salani molo-lidine'
initekumu' gizebo o none' nene olihe damo ido' a'minesi nene ma
ningamune' nenako nomihe ido' lemamilihe lo gate sita' gelamo a'mine
inite' nene mo ha noloseinako lemavo dalosune lo a'minemu' nene gele
ele'vole' ogovo' minelesune.

²Ido' O'moso'mi evenele gomu' minani' nete a'mine'mine igi gili
ele'vole' igi minaa' ani' nemu' nene O'moso'mo inginem'u' ninge lamine'
daa' ine' ve. ³Ido' O'mosomu' gele ele'vole' o none' ne'mo okulumoku'
ido' misubouko inite' mata' muki' soto' ogo neine' nene O'moso'mo
lavosavo' soto' ogo neine' nene mo gele none. Ido' ningaa' noune' inite'
mata' muki' nene ningesa'mune' initiatedunu' do soto' molani' nenako nesi
nene mo gele none.

⁴Ido' Adamu' gipele Kainiki Abeliki ingine inite' oluku' gizi O'moso
imasingutu' Abeli' aza nene O'mosomu' gele ele'vole' ogo minine' ne'mo
uvoloho Kaini'ni nene ivile' ogosa monovolo laminekisi minidotu' inite'
amine' oluku' gize imine' ve. Ne'mine ogavo O'moso aza mo lamine' ve
lo dani' nenako ne'mo Abeli' aza ve lisuhe' minine' nene mo lelebizavo
ningo nogilune. Ido' Abeli' aza nene mo helani' ma neine'za O'mosomu'
ne'mino gele ele'vole' ogo minine' ne'mo gamazi've nene ha minivo gelaa'
noune.

⁵Ido' gozopo' aka'mila Enoku' O'mosomu' gele ele'vole' ogo minine'
ne'mo olihe helamivo O'moso'mo ele'mize do vine' ve. Ido' ele'mize
do vine' nenako ezemu' nene evene' ingine vise' igi ma ningamani' ve.
Nemu' nene ei' monovomu' mono' godolou' ti' li gizi nizani' ma neive:
O'moso'mo olihe ele'mize do vamine' gamenelasi nene O'moso'mo ninge
amine' do-daa' ine' ve. ⁶Ne neiha O'mosola vo gi'mizelone li minilizave
ingine ezemu' nene ti' li gili gili ele'vole' igi minilizado' o neive: O'moso
nene nomine' nevoba mo neive. Ido' eze vise' igi ezela vi gi'mizave nene
meni lamine' ngemaa' ive ma ne neive. Ido' ne'mine li gili gili ele'vole' igi
minilizado' o neine' nenako ma gili ele'vole' amilizani' nene O'moso'mo
engi' ninge lamine' daline' aka nene ma minamoloseive.

⁷Ido' O'mosomu' gele ele'vole' oga' ive gohi ma Noa'ni nene O'moso'mo
evene' ngebeleleseive line' noso nene olihe soto' amivo a'mine noso soto'
ilingumu' nene lo soto' ogo lo-emavo Noa' aza O'mosomu' gele ele'vole'
ogo minine' ne'mo aza vene' izipesi goloso ogalone lo O'moso'mo lido'
gele lamine' o mino sipi ma loloi' ogo noso velo angu' nene gipele zuhosu
vene' izipesi nene do ngu' izine'. Ido' ne'mine ogo O'mosomu' gele
ele'vole' ogo minine' ne'mo misubouko aleve linge engita monovo goloso
minine' nene ngelebizine'. Ido' O'moso'mo ezemu' gili ele'vole' igi minaa'

ave mukiliti lu'ine nene do lisihe' o-ngedaa' neine' nenako Noa' aza ne'mine ogo O'mosomu' gele ele'vole' ogo minine' ne'mo nene ei' Noa' lulosi do lisihe' o-dine' ve.

⁸Ido' Abalahamu' aza O'mosomu' gele ele'vole' ogo minine' nenako nemu' nene O'moso'mo naza gelebizeloni' misubola ga' lo vozo lo lo-davo aza a'mido' gele do vine' ve. Ee, aza vo heteleline' misubo nemukisi nene ning gelamo gopo eze misubo've hulo O'moso'mo a'vopilemo' zuholiti misubo minelive lo alinge' imine' misubola nene ga' lo vo minine'. ⁹Ido' O'mosomu' gele ele'vole' oga' ive minine' ne'mo a'mine vozo lo-dine' misubolo' nene vo hetelo a'mida nene gopo venenga ve ne'mine gelo mino O'moso'mo a'mine misubo salani molo-lengedekuve lo lo huko-ngidive sita' ei' gipele Isakaki ido' Isaka' gipele Zakoboki nesi nene a'mida seli numungukovo' ingi monani' ve. ¹⁰Ido' seli numungukovo' ongo minine' nene O'moso'mo gala gelo luhuvo izo do soto' ine' numuno ebe' minevo' minevo' ingu' nene alinge' vo holalove lo gala gelo a'minemu' gizebo ogo mino seli numungukovo' ongo minaa' ine' ve.

¹¹Ido' Abalahamu' aza O'mosomu' gele ele'vole' oga' ive minine' ne'mo nene O'moso'mo gipa ma gedelesane lo lo huko-dine' nenako nemu' aza go'ne ngelo izamoloseinako mo gedelesuve lo gelo gele ele'vole' ogo minine' ne'mo elenaho Sala' aza gohuno vene' neivo ido' Abalahamu' aza ozoho molo izipe gedeli gamene osu' lavo ne'mini minasido' nene O'moso'mo Sala'ni izipe molo emeline' amuzo emavo Isaka'ni gidine'. ¹²Ne'mo Abalahamu' eze nene mo ozoho molo vani goloso molo minidot'i nene a'vopilemo' mukiliti avo'nibo lolol' ine'. Ei' hamokuti' nene a'vopilemo' vai' goloso soto' igi okulumoto' sonohi' ne'mine ido' noso gahevela gepe ne'minisa soto' igi evenelitesi gati nanike' nilizahe li ningamilizado' ne'mine minani' ve.

¹³Ido' a'mine mene lo-lingimuve muki' ingine nene O'moso'mo ngemelove lo salani molo-ngidive' inite' nene olihe engita soto' amivo hili vani'za a'mine inite' soto' iline' gamene nene olihe hoto' ha neivo mo soto' oloseive li ningi gili lanite' gili gili ele'vole' igivo' mini hilani'. Ido' ne'mine igi mini hilani' ne'mo ingine nene me misubou' mine gili' lo minelonive minamo ha venenga ve ne'minevo' gelo minelonive nene none li li soto' igi minani' ve. ¹⁴Ido' evene' ma ingine gamazi ne'minevo' nilavo ma nene ne'mo ingine mo mini gili' lilizani' ebe'ine atokumu' vise' igi gizebo igi nizave lo gelelesune. ¹⁵Ido' ingine gomu' mini mili minaa' ani' misubo'ninguko tine' mili gohi ma vilisa giladiniko tine' mili viliza aka'ine nene ha ngolo' lo minivo mo tine' mili vikedine. ¹⁶Vikedine'za ingine minani' misubo ivile' ogo minine' ebe' Okulumoku' neine' nela lu'ine nene vavo a'mine misubou' nene ha gopo minani' ve. Ido' ingine ne'mine igi minaa' ani' nemu' O'moso aza engi' O'moso'ine minine' nemu' nene O'moso'ine nouve loo lo soto' olosa ovozo helaa' ine' nevoba

olize izo lo soto' oga' ine' ve. Ido' aza nene engi' alinge' miniliza numuno ebe'ine do soto' ogo molo-ngidine' nenako ne'mo nene engi' O'moso'ine minine' nemu' ovozo helamaa' ine' nene mo gele none.

¹⁷⁻¹⁹ Ido' O'moso'mo Abalahamu'ni nene nenikumu' gele ele'vole' ihe amihe lo emengu' molo gipele Isaka'ni nene belo oluku' gize nemezo lavo Abalahamu' aza O'mosomu' gele ele'vole' ine' ne'mo gipele Isaka'ni nene belo oluku' gize emelesa ine'. Ee, gomu' nene a'mine Isaka'nimu' nene Abalahamuda O'moso'mo gamazi ato' ato' lo lo huko-do ti' lo line': Gei' guliveka di mini soto' igi mini-di dizilizani' ga'vopilemo' zuho nene a'mine Isakadatikovo' soto' ilisave lo lo-emavo Abalahamu' aza gele lamine' ogo a'minemu' nene gele ele'vole' ine'za Isaka' aza helaavo ma O'moso'mo gohi do ote-do lo huko lo nimine' gamazi nene ha do gihile izelido' o neive lo gala giline' nenako O'moso'mo lavo aza nene a'mine gipele hamo' Isaka'ni nene belo oluku' gizo O'moso lehize-delesa ine' ve. Ido' Abalahamu' Isaka'ni belelesa gamuno' neivo O'moso'mo geto o've lo-damidini Abalahamu' aza belavo mo heladinako nemu' nene hilingutii' O'moso'mo do tine' molo-davo ele'mizo ani' gelave.

²⁰ Ido' Isaka' aza O'mosomu' gele ele'vole' ogo minine' ne'mo gipele Zakobongi Esaungi engita alinge' soto' o-ngemeline' inite' nemu' nene lo-ngemo no'noho' ize-ngidine'.

²¹ Ido' Zakobo' aza O'mosomu' gele ele'vole' ogo minine' ne'mo helelesa mininguti' nene Zosehe' gipele sita' nene hamo hamo' Zakobo' no'noho' ize-ngidine'. Ne'mine ogo zalo' do oto gubi' izo O'moso opo'ni line'.

²² Ido' Zosehe' aza O'mosomu' gele ele'vole' ogo minine' ne'mo vani molo helelesa minine' gameneu' nene Kanaha misubo nene O'moso'mo ngemelove lo salani molo-ngidine' nenako neze zuho Isilaele' aleve ingine Aigita misubo nene huli Kanaha misubola tine' mili vilisave lo gala gelo gele ele'vole' ogo a'minemu' lo-ngemo ido' neni' amuzo'ne nesi nene di vii a'mine Kanaha misubola galese izilizave lo lo-ngimine'.

²³ Ido' Mose' soto' ogavo izelehoi melehoi ningasine' nene izipe lamine' goloso soto' ogavo ingine O'mosomu' gili ele'vole' igi minasine' ne'mo Aigita aleveti guve'nesi ve Halao' aza Isilaele' alevelati' gipe'ine ma soto' ikevo ma mo ngibili hili'mi vivo' minilisave lo lo huko-ngidingumu' nene golise gilami gili huli a'mine gipe'ine nene di haleki di minasivo ike'ni sito hamo vine'.

²⁴⁻²⁶ Ido' Halao' aluvo'mo Mose'ni nene do mongizavo minine' nenako aza nene ei' gipele gelo mino Aigita vetingu' evene' naba mino ne'mi lanite've ato ato' gelo minidine'za aza lodive ogosa O'mosomu' gele ele'vole' ogo minine' ne'mo O'moso'mo ei' evenele meni ngemelingu' nene nezesi nemelive lo nemu' lulo molo minine' nenako nemu' nene Aigita ve nete Isilaele' aleve ingine Kilisito' zuho ne'mine lili' igi minadi'mo di u'musupo lizi-ngidavo minangu' nene nazasi vo holo

engikisi mulumo gelo mineloni' nemu' O'moso'mo meni'ne nemeline' ne'mo Aigita misubou' heneni nganeni minine' nene ivile' o neive lo gelo ido' naza nene Aigita aleveti monovo golosolo' nene e'meto ne'mi lanite've nene nazasi ha gelo mineloni'za a'mine lanite've nene geto osu' liline' nenako nemu' nene ne'mine amo naza nene O'moso'mi evenele Isilaele' aleveu' nene vo holo engi' goboni mili-ngidangu' nene makato' mino mulumo alumo gelo minelone lo O'mosomu' gele ele'vole' ogo minine' ne'mo Halao' aluvo'mi gipele ve li-nidamilizave lo o've lo golise vine!. ²⁷Ido' O'mosomu' gele ele'vole' ogo minine' ne'mo guvelesi ve Halao' ne'mi golise've gelamo Aigita misubo hulo vine!. Ee, O'moso nene vetedunu' ngelo ningamolonido' o minine'za Mose' aza O'mosomu' gele ele'vole' ogo minine' ne'mo aza nene O'moso ninge neine' gele minivo minine' ne'mo nene Aigita misubo hulo O'moso'mo imine' gono nene hulamo geni bilingukisi ha amuzo molo do'mo vo minine!. ²⁸Ido' Mose' aza O'mosomu' gele ele'vole' ogo minive minine' nenako ne'mo nene aza ne'mine ine' ve. O'moso'mo angelo' ma imiselavo ogo Aigita aleveti gana' gipe'ine ngebelelingu' nene Isilaele' aleve leze gipetesi ngebelalive lo Mose' aza angeloli'mo ise'ine izeline' akalo' ngele'mize molo O'moso'mo lido' e'meto evene' lo-ngedavo Isilaele' aleve ingine sipisipi angale nene ngibili vanise'ine nene numu'ine gatedo' gatedo' nene noso mili hib'i izi hilika' hilika' ani' ve.

²⁹Ido' Isilaele' aleve ingine O'mosomu' gili ele'vole' ani' ne'mo guvo noso ma gulive Gulehe' Noso nene izo huko eza ema ogo goko' misubo ne'mino minine' gele minivo a'mingu' liki vani!. Ido' Aigita aleve inginesi a'mine'mine ogo volone li nivavo guvo noso ne'mo ihe' ogo do su'mize-ngedavo noso nii hilani!.

³⁰Ido' Isilaele' aleve ingine O'mosomu' gili ele'vole' igi minani' ne'mo O'moso'mo lido' e'meti Zeliko numuno ebeli'mi gesi gehenidunu' gizani' gesi ha'na nene go' laneme go' laneme nene gamene hamo hamo' di vodo vodo i-dika' i-dika' igi nizavo gamene seveni (7) ogavo a'mine gamene seveni (7) ne'mi lulou' nene gohi gamene seveni (7) ne'mine di vodo vodo i-dikevo a'mine gehenidunu' gizani' gesi nene ngululubizo lemo ongavo Isilaele' aleve a'mingu' dici Zeliko aleve ngibili gese' ani!. ³¹Ido' Isilaele' aleve lovo di Zeliko ebeku' olihe alisa navo a'mine ebeku' minine' pasidia' alu Lahaba' aza api' ogo O'mosomu' gele ele'vole' ogo minine' ne'mo Isilaele' ve sita' a'mine numuno ebe' Zeliko nene amamaka' mili ningi alisa vasive nene do lamine' o-ngedo numu'veu' ngele'mize molavo nemu' nene alinge' Isilaele' aleve nete igi Zeliko aleve O'moso'mi gamazi gili hulani' ngibili gese' angu' nene Lahaba'ni nene bilami iseve izi-dani' ve.

³²Ido' a'mine luvoni' evene' ingine O'mosomu' gili ele'vole' igi minani' ne'mine igi evene' linge muki' ingine a'mine'mine igi O'mosomu' gili

ele'vole' ani'za naza nGideoni' ve Balaka' ve Samusoni' ve Zehita' ve Davidi' ve Samueli' ve ido' O'moso'mi veleti' gamazi li soto' iga' ave polohete linge muki' engi' neti gamazi lo osu' lo lolosa luvodiniko lo do vo nouvo ha'na idine. Nemu' nene gamazi linge nene ngelo ma lo osu' lamolosuve. ³³ A'mine ve ingine O'mosomu' gili ele'vole' igi minadi'mo O'moso'mo hize ele' o-ngedo neivo engikuti' linge ma nete amuzo mili misubo mala mala vi O'mosomu' gilamave nene lovo i ngimi ngivile' igi engita di gelekele' i-ngidani'. Ido' engikuti' linge ma nete engi' misubo'ningu' nene monovo lisihe' laminekovo' minelive li evene' di lisihe' i-ngidaa' ani' ve. Ido' O'moso'mo ne'mine mana'mine inite' do soto' o-ngedelove lo lo huko-ngidine' gamazi nesi nene engita gihile izaal' ine' ve. Ido' engikuti' evene' linge ma nete loposo gulo laioni nete ngibililisa ikevo ma a'mine laizoni nete libilikelizave li evene' nete aka'ine nene hizi tili-ngidaa' ani' ve. ³⁴ Ido' engikuti' linge ma nete ololi'mo lo'vote-ngedelesa ine' amuzo've nene di hongu li-daa' ani' ve. Ido' linge ma nene lovo ve nete bainati mite' nedunu' ngibila' ani'za ingine olovo' lamine' ikevo bainati mite' ne'mo ngebelamaa' ine' ve. Ido' linge ma ingine gilizevo minanguti' nene amuzo ve lili' igi minaa' ani'. Ido' misubo mauti' ve igi lovo i ngimaa' angu' nene linge ma nete amuzo mili mini ngimiseli di vaa' ani' ve. ³⁵ Ido' vene' linge ma nene izipaha'ine hilikenguti' nene O'moso'mo do ote-ngedavo gohi ize'ningida igi gi'mizaa' ani' ve. Ido' linge ma ingine O'mosomu' gili ele'vole' igi minani' ne'mo ve malite gavoso ngibili goboni mili-ngidi ti' li li-ngidaa' ani' ve: Isetine izo gavoso lengebelamoloniko lingine O'moso mehedine imi mono' nene hulilizave li ne'mine li-ngidaa' ani'za alingeta hele noloninguti' gohi oto minevo' minevo' lemeni dameni lamine' doso' ma nenave li gili huli nizavo ngibilikevo hilaa' ani' ve. ³⁶ Ido' linge ma nene evenelite gamazi goloso palasa li-ngidi gize zohi' i-ngidi amuzo malehe nala' izi lobe tobe' ani' nedunu' nene ngibila' ani' ve. Ido' linge ma nene gize'nido' a'nido' seni nala' izi-ngidi huli nala' numungu' i-ngidaa' ani' ve. ³⁷ Ido' linge ma nene gehenidunu' huli huli' igi ngibila' avo hilaa' ani' ve. Ido' linge ma nene ngibili giti seta' iga' ani' ve. Ido' linge ma nene bainati mite' nedunu' ngibili hilaa' ani' ve. Ido' linge ma O'mosomu' gili ele'vole' ani' nemu' ngimiseli hulikevo oko'nido' inite'ine nomivo sipisipi losuvo ido' meme' losuvo nedunukovo' oko'nido' ngili moni oko'ine losuvo'mi inite' noso' initekisi ido' genegana'inesi muki' nene nomivo nimonavo goboni mili-ngidi di goloso i-ngidaa' ani' ve. ³⁸ Inginge O'mosomu' gili ele'vole' igi evene' lisihe' lamine' minadi'mo evene' linge muki' nene engito' lisihe' igi minamani'za a'mine aleve nene evenelite vasa izi-ngidikevo guhalii hali igi vi evene' nizamada ebe' hadivela ido' golola geheni muliku' ido' misubo luloukisi gopo ingaa' ani' ve. ³⁹ A'mine mene aleve muki' ingine ezemu' gili ele'vole' ani' nemu' O'moso'mo ningivo lamine' ine'za

lehize-ngedelove lo evenele zuho lo molo-ngidine' inite' nene olihe dami hilani' ve. ⁴⁰ Ido' a'mine O'moso'mo ngemelove lo lo molo-ngidine' inite' nene olihe dami hilani' nene nanitekumu' ve. O'moso'mo leli' olihe soto' amunivo engi' lehize-ngedeloni' inite' nene gomu' mili mudise dalizado' lisihe' i nizaha gizebo igi nizavo lelikisi makato' dalone' nene lamine' oloseive lo gomu' gele minine' nenako nemu' nene ingine olihe dami hilani' ve.

**Izesungumu' Gele Ele'vole' Ogo Monoli'mi Lesisi'veu' Loti'
Izo Mino Geni Lebelelingukisi Amuzo Molo Mineloningu'
Nene Laza Nadi' Olobe Nemu' Lo-ngimine'**

12

¹ A'mine O'mosomu' gele ele'vole' ogali'mi monovo di soto' mili lelebizave muki' ingine nene limuso ne'mini vai' goloso mini hizi vodo vodo i-lidi vonu' libili nizani' giline' nemu' nene laza okodela lihitehe' inite' vai' nene do hulo ido' lihime initeli'mo gizedelo' izo do mine' mine' iline' inite' nesi nene do hulo hazala ogo O'moso'mo aka lelebizidokovo' nene inite' mal'i'mo a'mine aka hize tile-ledamivo ido' ahukisi mo lamo lotikovo' izo vo minelone.

² Ido' ne'mino loti' izo novo O'mosomu' gele ele'vole' oga' monovolo' nene gomu' molo lemo a'mine monovolo' e'mete osu' losa aka lelebizive Izusu'nivo' nene e'meto volone lo eitokovo' nene vete hulo-do volone. Aza nene alinge' nolize izo minelongumu' ve lo gelo evenelite ve goloso ve li gili lohoto' zalo' bililizangumu' ovozo helo minelingumu' nene haza inite' ve lo gele hulo golise vamo a'mine lohoto' zalo' bilangukisi nene amuzo molo minine' ve. Ne'mine ogo O'mosolati' lemo mineline' mo'mosi'velo' O'moso'mo ana hulaa' ida vo neive. ³ Ido' Izusu' monovomu' gililizani' nene aza mo hize ele' o-ledeline' nenako nemu' nene lingine monoku' amuzo molaakumu' gosele' lengebelavo lutine nene vo gilizevo ogalive li lihime daa' ave nete Izusu'nii biluva' i-daa' angu' amuzo molo minine' mamu' nene gili minilo.

**Vete Zopovo Si'zo Monovo Lisihetokovo' Moneloningu' Ve Lo
O'moso'mo Geni Initeli'mi Lulou' Hulo-ledaa' Neingumu' Lo-ngimine'**

⁴ Lingine goloso inite' ne'mo do ongo-lengedelesa neivo amuzo mili lovo i imi a'mine'mi lulouti' nene lingine olihe vanise lepi hilamave.

⁵⁻⁶ Ido' lingine O'moso'mo muludingu' do lamine' ogo gipe'ne ve lo gamazi ma mono' godolou' ti' lo lo-lingidine' mamu' nene gatine molahe. Olo:

Gipe'nee, Guvelesi ve'mo evene' ma lulo ngemo minelive nene ve'ine zopovo si'zi monovo lisihetokovo' monilizangumu' ve lo geni initeli'mi lulou' ngele'mize molaloseive.

Ee, gipe'ne ve lo ningaa' ive muki' nene

ve'ine zopovo si'zilizave lo ngebeleleseive.

Ido' ne'mine oloseinako nemu' nene gaza Guvelesi ve'mo veka zopovo si'zo monovo lisihetokovo' moneline lo do lisihe' o-gedo geni initeli'mi lulou' gele'mize nomolavo ma gaza nemu' gelanivo haza inite' lolo' amivo.

Ido' lihimeka nogimivo ma nemu' gosele' gebelamilive.

⁷Geni initeli'mi lulou' mini ma nene Guvelesi ve'mo lele'mize akalo' neive li a'mine inite' nene gosele' lengebelamivo ha gihi minilo. Me'ninge nete gipe'ine ma ve'ine zopovo si'zilizave li ngibili di hehe li-ngidami huli-ngimikavo minani' nene ma minamavo mukito' nene ngibili di hehe li-ngidaa' nani' nemu' nene O'moso'mo linginesi gipe'ne nizave lo ne'mine o-lengedo noloseive. ⁸Ee, me'ninge muki' nete gipe'ine ve'ine zopovo si'ziliza inite' di-ngidi di hehe li-ngidaa' naanako lengikisi O'moso'mo ne'mine o-lengedo minamine' neidiniko ei' izipahala zuho minami akalo' izipe ne'mine minadine. ⁹Ido' a'mine gamazilo' imine' molo ma lolove. Ha okode losuvosi none' mene gidave metemote nete leli' vete zopovo si'zilizave li di hehe li-lidavo gelekele' o-ngedo mino lamine' gilune' nenako nemu' nene ne'mine o-ngedaa' noune' nene ivile' ogo vode lute lemeni dameni do soto' o-ledaa' ive metehine nene nabosa gelekele' o-duke'vo. Olo. Ee, laza ne'mine ogo ezelati' minevo' minevo' lemeni do minevo' minevo' olosunako nemu' nene gelekele' nabo o-do minelone. ¹⁰Ee, me misubou' metemote di hehe li-lidavo gelekele' o-ngidune' nene ingine engi' lu'nido' lamine' oloseive li gilado' gamene li'nibevu' di hehe li-lidaa' ani'za O'moso ei' ne'mino lihimete goloso daa' monovote nene nomivo monovote lisihekisivo' minelone lo lele'mize lamine' iline' inite' do soto' o-ledo do hehe lo-ledaa' neine' nenako nemu' nene gelekele' nabo o-do minelone. ¹¹Vete zopovo si'zeloningumu' ve li di hehe li-lidi geni initeli'mi lulou' lele'mizi milikevo a'mingu' minelone' gameneu' nene lolize izo lanite' gelo minelonivoba ha mulumo alumo gelo minelesune'za ne'mine olone' ne'mo lele'mize akalo' ogavo ma alinge' ne'mi gihile've nene monovo lisihelaminekovo' ogo molo nonivo lute nene zou lo minaa' neive.

¹²O'moso'mo vetine zopovo si'zilizave lo geni initeli'mi lulou' lengele'mize molaa' neine' ne'mo nene lengele'mize lamine' oloseinako nemu' nene lingine lutine gopo o vivo lutine'mi gizene ana've nene gulu' gelo izo bele vivo lutine gilizevo ogo minaa' neine' nene gohi di oti-di gonou' ele'mizi milalo. ¹³Ne'mine igi lutine ne'mo mono' akalo' volosa neivo ma lengiku' ve ma lingine lutine'mi gizene've goloso o vivo minave lingine nene gopo aka mili vami a'mido' lamini nivi lamine' ilizangumu' nene aka lamine' di hehe li vi minilo.

Inginge Monovo Lisihe' Igi Mili Ami O'moso Mehe'ine Imikevo Lihime nGemalive Lo Ga'ine Dani' Gamazi

¹⁴Ido' lengiku' lovo lolize nene soto' ogalive li evene' mukita hongu monovo nene igi mili ngelebizi minilizangumu' nene amuzo milalo. Ido'

ve ma ingine O'moso'mi eveneleelite di minilizani' monovo lisihe' lamine' nene engita nomivo minaa' nave nene Guvelesi ve mo ningamilizani' nenako lingine hongu monovo igi mili ilizadot' nene O'moso'mi evenele nounako li monovo lisihe' laminetokovo' e'meto volone li amuzo mili minilo. ¹⁵ O'mosolati' nasahili' lamine' nene lengi' zuho malite ningi huli aka malo' vikelizave li ge gizebo o-nede ne gizebo o-gede li minilo. Ido' lengi' zuho mali'mo lengi' vovotingu' mino za mali'mo gihile ekese' ine' izaa' neine' ne'mino mino monovo goloso ato ato' do soto' ogo lengita geni do soto' o-lengedo neivo lengikuti' evene' lingela muki' nene a'mine'mine igi monovo goloso dikevo lutine do gopo ogalive li gizebo lekeseve igi minilo. ¹⁶ Ido' lengikuti' vene' vemoho' gopo'napa ingi monikelizave. Ido' lengikuti' evene' ma Esau' ne'mine mini O'mosomu' ga'ine molavo me misubou' initekumukovo' gili minikelizave li ge gizebo o-nede ne gizebo o-gede li minilo. Esau' aza nene Isaka' gana' gipele mino melehid' medelo mino melehi inite'velokisi nene medelo minelido' minine'za gamene ma a'mine uvoloho Esau' aza ga'na helo nakunolo Zakobo' noso' nite' gize vata' ogo minine' nenako a'mingut' nene linge ma nemavo nalangisi ve lo haza misubou' inite' noso' niteto' nene melehid' medelo mineline' mo'mosi've nene nakunolo Zakobo'ni eme molani' ve. Ee, Esau' aza O'mosomu' gala molavo me misubou' initekumukovo' gele minive mino haza noso' nite' nene gamene hamokovo' nalosa ido' nene inite' naba melehid' medelo mineline' mo'mosi've nene Zakobo'ni imine' ve. ¹⁷ Emavo Zakobo' ezelo' medelo minavo alinge' meleho aza gana've no'noho' ize-deliv' no'noho' nene Zakobo'ni ize-davo Esau' aza me'neho no'noho' nene do tine' molo nen'i no'noho' ize-nedeliv' lo ive ogo lulo do velepe' izeline' aka vise' ogo minine'za ma ningamivo meleho aza Esau' gamazi've gele huline' nene linge mo gili nizani' ma neize. Nemu' nene linge eze ine' ne'mine amilo.

¹⁸ Lingine O'mosola igi gi'mizani' nene Isilaele' aleve leli' avotemote Sinae golola lou' gamazi lo huko-ngidine' dalisa vangu' soto' ogo minine' inite' ne'mido' nene lingine ma amave. Ingin ha ve'inedunukovo' ningi ido' ga'inedunukovo' gililizani' inite' nevo'minevo' neido' ani' ma neive. Ee, ingine Sinae golola vado' nene olo' gulumo ogo minivo ido' liti'muso goloso izo minivo ido' hepe' naba momu gehe gehe ogo elo minivo ¹⁹ ido' pikuli ne'mo nolo naba molo minivo ido' O'moso'mo gamazi livo gilave nete nolo nene gilangumu' golise gili gamazi gohi ma lelito' lisihe' ogo lo lemamilive li amuzo mili Mose'nii li-imani'. ²⁰ Ido' O'moso'mo ti' lo lo huko-ngidine' nemu' ngemengingi goloso izine': A'mine Sinae golola vi lisi gililiza initepe evenepe nene mo geheni huli huli' igi ngibili hililizave. Ido' evenekovo' nevoba ize gulo nesi a'mida vi lisi gililizani' nene mo ngibili hililizave lo line'. ²¹ Ee, ingine ningani' inite' nene ngemengingi

izaa' inite' atoli'mine goloso minavo Mose' aza nehelele goloso izavo luvoluvo zalo' do nouve lo lo-ngimine'!

22 Ee, lingine nene avotemotida Sinae golola ngemengingi inite' soto' o ngimine' ne'mido' nene ma vamave. Asi a'mine ngemengingi inite' ivile' ogo lamine' goloso minine' initeto' ikeni' neive. Ido' Zelusalemi numuno ebeku' minine' golo Zaioni ne'mine minevo' minevo' O'moso'mi numuno ebe' Zelusalemi ne'mino Okulumokuko minine' numuno ebeku' Zaioni golo mala nene lingine mo imi hilikeve. Ido' angelo' tauseni tauseni ne'minete zege' zege' igi ngolize izi minadasi 23 ido' O'moso'mo no'noho' ize-ngedeline' izipahala Okulumo' ebe' ngemelingumu' gulive'ine Okulumoku' gize molave engi' muliseukisi nene mo imi hilikeve. Ido' evene' mukiliti O'moso leli' zaasi naba minidaso ido' ve lisihel' ne'mine mo hilikevo sikalahu'ine O'moso'mo mudise ngele'mize lamine' ogavo nizada nesi nene mo imi hilikeve. 24 Ido' lelikisi O'mososi kuku holo-ledo gamazi hulo volelo' melo' o-ledo O'moso'mo gamazi lamine' gosoho' lo huko-lidine' lo-do ogo limive Izesuda nesi imi hilikevo vanise've lutido' hibi' izo huline' gelavo minikeve. Kaini' aza Abeli'ni bele hiline' vanise've nene misubou' do'mozavo O'moso'mo ningi Kaini'ni nene lihime imine'za Izesu'ni bili hilani' vanise've nene ningi lihime lemamo isete izine' nenako a'mine vanise've ne'mo gono dani' nene Abeli' vanise'mo gono dani' nene ivile' ogosa gono lamine' dani' ve. Ne'mo lingine nene mo a'mingu' imi hilikeve. Ido' lingine a'mingu' nene mo imi hilikenako nemu' nene O'moso'mo nasahili' o-ledo hize ele' o-ledaa' neine' nene lengikuti' ve malite ningi huli monovo goloso lengi' vovotingu' di soto' ikelizave li gizebo lamine' igi minilo.

25 Ee, O'moso'mi gamazi Izesu' lo-lingimine' nene hulikelizaze. Gizebo lamine' igi minilo. Inginge O'moso'mi gamazi misubou' mene Mose' lo-ningimine' gili hulave nene O'moso'mo ngebelelinguti' olovo' igi golise viliza aka'ine ma minamivo aza lihime ngemaa' neine' nenako nemu' O'moso'mi gamazi nene Okulumokuti' lo-limine' nenako gele hulolone' nene laza O'moso'mo lihime lemelinguti' nene mo keke' ngelo olovo' amolosunako nemu' nene a'mine gamazi nene gili hulikelizaze. Gizebo lamine' igi minilo. 26 Mose' Sinai gololo' dizo minine' gameneu' nene O'moso'mo gamazi nolo-imivo nolo ne'mo misubo nene do mo'mongo' ine' ve. Ido' O'moso'mo idise ti' lo lo huko neine' ma neive: Ihe' inite' muki' nene gamene hamokovo' ma do mo'mongo' olosuve. Ido' misubovo' nevoba okulumo' nesi do mo'mongo' olosuve lo line' ve. 27 Ido' inite' mata' nene gohi do mo'mongo' olosuve lo line' nene aza inite' mata' muki' do soto' muluvoni' nene do mo'mongo' ogo do hulokovo mo'mongo' ami minilizani' initekovo' nene ha minivi' minivi' ilisave lo gele mino do mo'mongo' ilingumu' line' ve. 28-29 Ido' laza O'moso'mo gizebo ingu' mo'mongo' amiline' ebe' minevo' minevo' ilingu' nene vo holokune'

nenako nemu' nene O'moso isaa' neve lo-do opo'ni lo-delone' nene mulunou' lamine' gelelidokovo' o-delone. Ido' ololi'mo inite' lo'voto osu' liline' ne'mino O'mosote ne'mo evene' goloso ngebele osu' loloseinako eze opo'ni lolone' nene ezemu' lehelele izivo golise've gele mino ne'mine ogo minelone.

**Ogo Molo Nonivo O'moso'mo Ning'e Lamine'
Iline' Ne'mi Gamazi Lo-ngimine'**

13 ¹Lingine monoku' nene hamo' zuho lili' igi mini lutine nene ne geme ge neme li minaa' nani' nene lengitati' huko vamivo mini di vi minilo. ²Ido' evene' malite venenga ve ma engi' minada ikevo ngele'mize lamine' igi hazza evene' nene ne'mine noo-ngidube li gili angelo' nene ngele'mize lamine' ani' nenako nemu' lingine venenga ve ngele'mize lamine' ogakumu' nene gili hulikevo gatine molalive. ³Ido' Izusu' evenele ma nala' numungu' huli-ngidikevo minangu' nene lingine engikisi makato' nala' numungu' mini mulumo alumo gili nizani' gilivosa engikumu' gili mini hize ele' i-ngidi minilo. Ido' lingine ha vetinesi mini olihe ma hili vamanako lengikisi nene a'mine'mine igi goboni mili-lingidilizani' nene agae ma hize ele' i-lidavoo li minilisanako nemu' nene goboni mili-ngidavo minaa' navemukisi nene gili mini hize ele' i-ngidi minilo. ⁴Ido' vene' vemoho' gopo' napa ingalizani' nene O'moso'mo lihime ngemeleseinako evene' muki' nene vene' vemoho' lili' iga' monovomu' nene gili lamine' i mini di gopo ami lisihe' lamine' igi mini eledingesivo' ido' vadingesivo' ingalizave. ⁵Ido' Guvelesi ve aza lengi' mo keke' hulo-lengedo vo haha amolosuve lo line' nenako nemu' lingine lutine nene moni henenilo' vaalive. Inite' gohi ma daloinako li mumuzo' ami lingine di minani' inite' nene leli' votigilelo' lisihe' o neive li gili hongu li lamini minilo. Ee, Guvelesi ve aza lengi' hulo-lengedamolosuve line' nenako ⁶nemu' nene laza gopo gate gelamo ezemu' gele ele' vole' ogo mono' godolou' ti' li gizi nizani' gamazi ma nene ha ti' lo lolosune:
 Guvelesi ve aza hize ele' o-ledaa' neinako
 laza inite' mamu' lehelele izelido' nomivo
 ido' evene' nete ma di goloso i-lidilizado' minamune.

⁷Ido' O'moso'mi gamazi li-lingimave gizebo vetine ingine mono' akalo' nivi hilani' engita nene gili mini gizeka'nido' nene ningi hehe li mini nge'meti nivi ingine O'mosomu' gili ele'vole' igi minaa' ani' monovo'ine ne'mido' nene lingine api'napi' igi di minilo. ⁸Izesu' Kilisito' aza nene gomu' minine' monovo'vesi hazavo' mino monovo've nene do ato' amo idisesi nene mo a'mine'mine ogovo' mino mine do voo mineleseinako ⁹nemu' nene evene' ma mono' gamazi ve li soza gamazi ato ato' li-lingimilizani' ne'mo gatine hizational. Lute hize ele' oloseive li noso' nite' naakumukisi li-lingimilizani'za lute hize ele' o-ledaa' neine'

inite' nene noso' nite' nevoba asi O'moso'mo nasahili' o-ledaa' neine'
 ne'mo lute amuzo molavo ne'mo nene lamine' iline' nenako a'mine noso'
 nitekumu' li-lingimilizani' gamazi gili daa' nave nene a'mine initeli'mo
 negele'mize lamine' amaa' neine' nenako ne'mo gatine hizalive. ¹⁰Ee,
 O'moso imani' noso' initekuti' nene ha nalisave li li-lingimilisani'za
 nemu' lo-lengemeloze. Gililo. Sipisipi ize nevo'mine bili O'moso'mi
 holomolo' mili gizi imisa naa' nani' ne'mine inite' gelo minivete Kilisito'
 nene leli' sipisipi nevo'mine initete lolo' ogo lelita mine molo neive.
 A'mine Kilisito' nene O'moso belo gize emaa' sipisipi ize ne'mine lolo'
 ogo neivosa laza nene ei' Izesu'nimu' gele ele'vole' ogo minaa' noune'
 ne'mo ei' Izesu' oko'no naa' noune' gelave. Ne'mine oga' noune'za Zuda
 veti mono' numuno ado' seli numuno avazahalo' gizani' miningu' nene
 vi hili mini sipisipi nevo'mine bili O'moso imangutii' naa' nave ingine
 nene leli' sipisipi izete ne'mine lolo' ogo neivo laza eze oko'no nene naa'
 noune' gilivo minaa' noune' ne'mine igi ingine gohi Izesu' oko'nosi nene
 nalizave lo O'moso'mo gele ngemamine' ve. ¹¹Ido' gele ngemamine'
 nene Kilisito' avazahalo' ingine nene ize ma bilikevosa eveneto' medelo
 mino O'moso inite' lehize-daa' ive naba aza a'mine izeliti vanise'ne nene
 eveneliti lihime'ine apaselingumu' ve lo O'moso'mi kekeize atoli'mine lo
 minine' numuno lulouko nene do dizo hibi' izo O'moso emavo sikizapovo
 nene mo keke' nami di vi numuno ebe' heta gizi'votaa' ani' nenako nemu'
 a'mine'mine igi ize ne'mi avazahalo' minive bilangutikisi nene ingine
 mo nani' gilivo minilizave lo ma gele ngemamine' ve. ¹²Ido' a'mine ize
 ne'mi vanise've nene O'moso imi sikizapovola nene di vi numuno ebe'
 heta gizi'votaa' ani' nenako ne'mo Izesu' aza ei' vanise'vedunu' eveneliti
 lihimete apase-ledo O'moso'mi evenele lolo' ogo minelonido' do lisihe'
 o-ledelesa Zelusalemi numuno ebeli'mi gesi gatedoti' lemo heta ogo
 mulumo gelo hilin'. ¹³Nemu' nene Zuda veti gesi mingutii' lemo vida
 nene lazasi lemo vo heta ogo ezela gi'mizo mino eze ovozo hilin' inite'
 i-di minaa' ani' ma'mine igi leli' lovovo hele lone' inite' i-lidi minilizani'
 nene gopo gehe do vuke'zo. ¹⁴Ido' ezemu' lovovo hele lone' inite' geho
 Zuda veti gesi mingutii' lemo vo heta alone' nene minevo' minevo'
 iline' numuno ebete me misubou' nene ma minamivo minevo' minevo'
 numuno ebete nene alinge' soto' o-ledelingumu' gelo a'minemii' gizebo
 ogo ne'mine alone. ¹⁵Nemu' nene eze evenele nene none lo leli' veteti'
 eze gulive oga' noolonivete a'mine gulive nene do oto minelonido' o
 neine' nenako nemu' nene Izesu' akate vele-lidido' nene e'meto O'moso
 ize bili imaa' ani' ne'mino laza nene gamene gamene veteuti' O'moso
 opo'ni lo-emo minelone. ¹⁶Ido' evene' nasahili' i-ngidi inite'ine nomivo
 nizani' aleve nene inele i-ngidi minilizani' ne'mo ize ato ato' bili O'moso
 gizi imaa' ani' inite' ne'mine lamine' ma imani' gelavo mulunou' lamine'
 geleleseinako nemu' nene ne'mine ogakumu' gatine molalive.

¹⁷Lengi' monoku' gizebo i-lingidaa' nave nete di minaa' nani' gono'ine ne'mi monovomu' nene alinge' gamene nabalo' O'moso'mi velelo' li soto' ilisanako nemu' gili mini ingine nene lengi' monovotido' gizebo lamine' igi di lisihe' i-lingidivo' minaa' nave. Nemu' nene lengikumu' geni ngebelamivo gono'ine nene ngolize izi lu'ine laminetotikovo' daa' ilizave li lingine engi' gamazi lilizado' gili di mini gelekelekovo' i-ngidi minilo. Ee, ingine lengikumu' gosele' ve li geni ngibilivo gono dalizani' ne'mo lengi' lengele'mize lamine' amilizado' o neine' nenako nemu' liliza gamazilo' nene gelekelekovo' i-ngidi minilo.

¹⁸Laza gamene gamene monovo lisihekutikovo' ogo molo minelone lo gelo minaa' noune' nenako laza gilune' leli' lute nene O'moso'mi velelo' lisihe' goloso o neive losa gele none. Nemu' nene lingine O'mosola lelikumu' ve li li minilo. ¹⁹Ido! O'mosola nenikumu' li-nidikevo ne'mo nele'mize lamine' ivo lengita lite' losa tine' molo alove lo amuzonga noluve.

Gamazi Lo Osu' Lolosa O'mosola Laa' Ne'mino Line'

²⁰Ido! O'moso nene zou lo minaa' monovo do soto' o-ledaa' ive mino aza nene ei' evenele sipisipi ize ne'mine gelo minunive leli' gizebo vete naba Izesu' Kilisito' aza vanise've lepo leli' gele daloningumu' ve lo O'moso'mo lo huko-lidine' minevo' minevo' iline' gamazi do amuzo molavo gohi hilinguti' do ote-dine' ne'mo ²¹O'moso aza nene lingine ei' lulolo' e'meti gili dalizangumu' ve lo ne'mine ilizado' do lisihe' o-lengedo monovo lamine tamine' muki' nene lehize-lengedo Izesu' Kilisito' amuzo ne'mo lutingu' gono do eze ninge lamine' iline' monovo nene do soto' o-lengedelive lo ido' eze opo'ni livi' livi' igi mini izi hukamavo minevo' minevo' ilive lo mo ne'mino miniliho lo noluve.

²²Neze zuhokizo, lutine do ngi lo-lengedo luhuwo inite' mene do li'nibe ogosa gizuvoni' nenako nemu' nene gosele' lengebelamivo gati gili minilizave losa lengita amuzo molo noluve.

²³Ido' ti' lo nolo-lingimuze. Gililo. Leze zuho Timoteo'ni ma nene nalato' minidotil' mo imiselikeve. Ido' mo imiselikenako aza lite' lo nouvoda ogo heteleline' nene ninge-lengedelesa lengi' nizada nene makato' ogo hetelelesusive.

²⁴Ido' lengi' gizebo vetine nesi O'moso'mi evenele muki' nesi nene longopo'ni noluze. Gati li-ngimilo. Ido' O'moso'mi zuho Italia misuboukoti' minani' ingine netesi longopo'ni nilave.

²⁵O'moso'mi nasahili' ne'mo nene lengita mine do vo miniliho lo noluve.

Moda a'nesi' ve.